

名

山

藏

名山藏卷之二十八

臣何喬遠恭

典謨記

世宗肅皇帝

四十一年正月丙戌朔命朱希忠攝拜天玄極殿羣  
臣望朝大朝門修三慶吉典于內殿肅王弼桃莞二  
月修春祈大典大高玄殿三日罷親賛禮取戶部白  
金二十萬爲內供福建倭製破永寧衛以京城多盜  
命朱希孝葛縉晝夜衛西苑建春祈典洪應雷宮九  
日錦衣衛都指揮僉事嚴鵠獻玉兔靈芝方士藍道

行獻壽龜皆告廟受賀三月總兵石邦憲大破播州  
土舍韓甸平之玉兔生子二謝玄告廟羣臣表賀舉  
恩生瑞醮二十五日萬壽宮成上悅其速加恩階衡  
等有差四月移御焉舉迎恩大典五日羣臣表賀魯  
酋土蠻等大舉寇遼東東關驛錦川營破之上命楊  
博計禦使葛縉兼都察院右僉都御史往視軍情上  
禱雨禁中鄴縣散官金進靈芝五色龜授太醫院御  
醫上曰龜靈芝色數兼五非玄賜耶遂命希忠告廟  
羣臣表賀兔再生二子上曰玄恩重示延生之祥特  
爲罕遇命駙馬詔告太廟建謝典焉五月虜犯遼東

副總兵黑春帥遊擊徐維忠等敗之備禦劉晉亦敗  
虜于核陶山捷聞上曰將吏用命玄賜也賞督視軍  
情侍郎葛縉等功有差上憂南寇南贛都御史陸穩  
言三月中署平和縣者府知事胡期亨典史談蘊領  
鄉兵與璉戰城下賊少平和期亨鼓行甚銳皆驚謂  
有大兵至蘊麾衆疾擊之多所擒獲會提督兩廣都  
御史張臬亦報程鄉賊子雲福保等皆就擒上大悅  
歸感玄恩論諸臣功有差是歲當選庶吉士而嚴嵩  
柄國仕路溷濁進士貧者稱貸以納賄有貸于司禮  
太監錦者錦密以聞上惡之詔罷選以財匱命戶部

集議足國裕民計御史鄒應龍劾奏嚴嵩子世蕃孫  
錦衣鵠中書鴻其家奴中書羅龍文不法狀上曰人  
惡嚴嵩久矣朕以其贊玄壽君特優眷乃縱逆醜子  
負朕其令致仕予傳去有司歲給祿米百石其家世  
蕃等下鎮撫拷問之三法司擬罪以聞遂卽陞應龍  
爲通政司右參議嚴嵩乞哀自効不許已法司坐上  
世蕃戍烟瘴鵠鴻龍文於邊遠衛上特宥鴻爲民使  
侍嵩老嵩雖去上忽忽不樂也恐大學士徐階不如  
嵩謹奉玄羣臣復欺謗曰朕遂傳位裕王退老西內  
顯祈長生階等諫上曰則必皆仰奉上命同輔君闡

玄修仙乃可臣下有再言嵩者所都應龍斬之矣設  
平遠縣虜寇遼東湯站堡副總兵黑春力戰一日死  
之賜贈廕祭祠六月以徐階言罷聖節文撰上曰凡  
月之丁卯前四日後五日止不急不吉封臨時下諭  
者不在限於江西興寧廣東程鄉安遠福建武平四  
縣間設鎮城名曰仲威以備盜以俞大猷爲協守南  
贛汀漳副總兵方逢時爲廣東兵備副使彈壓之久  
亦罷以宮災龍涎香燬命有司急購之免又生子四  
告廟受賀發太倉銀三萬緡山西以備虜以萬壽節  
屆修迎恩大典于高玄等壇張臬以閩廣江西兵勦

張璉蕭雪峰等平之告郊廟社稷百官表賀七月參  
將戚繼光進勦寧德倭於橫嶼大破平之乘勝勦福  
清牛田寇又破之瑞兔四各生二子上曰天垂生祥  
于孟秋卽聖仲秋前應朕生辰此又非常瑞其告廟  
受賀苑田嘉禾生亦命告廟受賀八月上以聖節建  
醮急得龍涎香而宮災時有私收得者戶部尚書高  
燿密購以進上大悅命倍給其直加燿太子少保萬  
壽節命朱希忠攝拜天玄極殿羣臣望朝大朝門重  
錄永樂大典九月以三殿成告郊廟社稷更名奉天  
殿曰皇極華蓋殿曰中極謹身殿曰建極文樓曰文

昭閣武樓曰武成閣左順門曰會極右順門曰歸極  
奉天門曰皇極東閣門曰弘政西閣門曰宣治百官  
表賀詔天下閣臣請赦上曰赦者小人之幸民拽石

輓木彼受賜歟論殿工恩司禮監右監黃錦等工部

尚書雷禮竝加廕敘工部尚書徐杲支正一品俸錄

一子

杲工部匠籍也爲匠作情匠事工師逐之逃之  
野遇道人問所繇因詣之曰吾欲作一室九十九柱爾能之乎曰不能因教杲結構法殿工之興也

上欲用九十九柱以符陽數獨昇上應詔遂加委任

以瑞免嘉禾生建承恩大典命公溶等告六宮廟府  
部等衙門皆叩帝壇而奏香建秋報典大高玄殿三  
日十月福建新倭大至突犯福清福寧政和等處延

綏總兵趙岢分部出塞擊虜勝之建承佑總慶吉典  
七日封肅世孫紳堵爲肅王江西流賊平廣東官兵  
追捕張璉餘黨賊首林朝曠等獲之潮寇悉平十一  
月福建官兵擒龍山賊蘇阿普斬之虜犯山西神池  
等處大掠數日裕王第二子翊鎰薨追封爲藍田王  
命御史姜徵王大任訪求法士秘書於天下臣民有  
進者賞南京戶科給事中陸鳳儀劾奏總督胡宗憲  
欺橫貪淫十大罪詔械治京師遂罷設浙直總督郊  
之日天爽上大悅諭禮部臣曰朕荷穹眷大報禮成  
代者忠敬百執效勞宜有特恩遂加希忠等官秩有

差虜大入犯寧夏清水管等處副總兵王勳戰死賜贈廕世襲給僉金祠死所福建倭攻興化府陷之十二月禱雪宮中甘露降顯陵上大悅告郊獻廟乙丑月食雲隱不見雪百官表賀胡宗憲逮至上曰宗憲起御史皆朕擢用非嵩黨三呈玄瑞近上玄秘皆致一手書任事數年不聞指摘近自應龍發嵩諸臣復彈罷大臣不已本兵始議獲王直者五等封今罪之後來誰與我任事其釋令閒住

四十二年正月庚辰朔命朱希忠攝拜天玄極殿羣臣望朝皇極門以伊王不如詔毀宮垣奪祿米三之

革其護衛廣東倭犯惠潮二府御史凌儒請舉用  
故修撰羅洪先上怒以爲賣直市恩逮杖之黜爲民  
甘露再降於顯陵遣定國公延德往祭加守備太監  
恩一級守臣及供奉園陵者各賜金帛有差淮王厚  
壽薨設澄海普寧二縣虜犯宣府掠隆慶永寧等處  
故大同總兵爲事官劉漢戰却之賊西行會大雪乃  
遁凡七日二月戶部用太倉白金二萬七千七十兩  
購眞珠八萬千八百顆寶石三色五千塊以進上以  
未有猫睛祖母碌命再購復購綠撒罕尼石紅刺石  
比阿洗石金剛鑽米藍石訾英等石虜犯遼陽副總

兵揚照遮擊之清河遁出塞未幾復犯長安堡照設伏繞出虜前斬首七十五級獲達馬五十四興化倭結巢崎頭城泉州衛都指揮歐陽深與晉江縣學生薛天申死之賜礮金膺祠贈天申爲指揮僉事賊乘勝攻陷平海衛倭自福寧政和等縣襲寧德破之趨羅源入海轉薄連江登岸上曰壽源祝帝萬法景修自十一日始至丁卯後五日皆毋以雜瀆擾以倭陷興化命張臬總督兩廣軍務調兩廣兵馬分部擊之使總兵官劉顯戴罪殺賊三月設黃安縣舉祈年大典洪應雷宮七日四月嚴嵩歸至南昌延道士田玉

等爲上醮鐵柱宮以聞玉因以所藏名鶴符驗法書

附奏嵩玉皆賞賚有差上諭內閣曰天降玉兔一于

昨歲總生十子內四數之一今日午時緒生四瑞語

爾知焉階率羣臣表賀建宮壇典三日告太廟

按緒也

龜日元緒世廟奇語如此雲南進寶石三百六十兩有奇賑金復

海蓋三衛民福建新倭自長樂流劫福清等處總兵

劉顯俞大猷合擊於遮浪殲之平海倭引舟出海把

總許朝光以輕舟抄之斬首四十九級賊盡焚其舟

還屯平海雲南進礦金四百兩礦銀萬兩副總兵戚

繼光與劉顯俞大猷夾攻平海倭大破之福州以南

倭悉平論功有差五月三衛夷酋通罕者虜辛愛之  
義妻父也三衛夷嘗撲殺我諜卒四人至是副總兵  
胡鎮執通罕以求撲卒之罪夷通罕子懼以罪夷至  
請以易其父薊遼總督侍郎楊選計欲以牽制辛愛  
使毋寇邊畱通罕令與其諸子更迭質上疏聞以自  
爲功且爲諸臣請賞兵部覆從之於是選及巡撫順  
天僉都御史徐紳總兵孫臞等皆賞有差刑科左給  
事中陳瓚請錄用在告諸臣上曰瓚幻奸必行險儒  
所言卽以治儒者治之杖而黜爲民程鄉賊溫鑑梁  
道輝等平六月壬戌月食戶部進貓睛祖母碌等石

四百五十塊用白金四萬七千八百餘兩甲子醮大  
高玄壇至八月終止停常封七月命撫按官不待復  
命卽訪有司貪汚者以名聞西苑龜生五卵告廟受  
賀雲南進青黃紅寶石六千七百六十九塊取太倉  
中庫白金十五萬爲內供八月苑田嘉禾生獻廟受  
賀建壽醮朝天宮三日萬壽節遣朱希忠攝祀天玄  
極殿羣臣望朝皇極門致仕大學士嚴嵩李本各表  
賀兼進帝壇香燭本復獻聖德同天萬年純佑頒上  
嘉納之各賜銀幣祿王三子生神宗皇帝也以訪求  
玄秘加姜微王大任俸一級虜聚衆遼東廣寧塞外

總兵楊照率遊擊線補袞郎得功等出塞分掩之照夜失道中流矢死補袞等馳至搏戰斬首百二十餘級虜引去賜照贈祭祿謚祠死所九月上偶使人醮壇壇道士中佩不在有惡刑部員外郎邵峻者言中佩過唆爲夜飲上怒命皆捕杖之唆黜爲民建秋報大齋大高玄殿三日上諭兵部曰雨異風作倏自北起楊照事可見當內謹火而外嚴邊以共天示以徐沛豐陽四縣水蠲賑之十月罷遣番僧封諸藏著爲令冊封吉世子翊鎮爲吉王建醮萬法壇九日停常封楊選質通罕父子三衛夷皆怨益與虜通遂勾虜

入寇虜佯東行巡撫金都御史徐紳請選守牆子嶺  
選曰虜東不爲備却焉紳自將赴之虜遂突攻陷牆  
子嶺寨長驅深入選怒殺通罕父子引兵而尾虜京  
師戒嚴詔宣大總兵官馬芳姜應熊劉漢等速人援  
以總督尚書江東統之丁卯虜屯平谷掠通州上自  
宮中望見火光曰虜當不遠諸將何不勦逐勅文武  
大臣門諸門鎮遠侯顧寰布京營兵城内外戊辰選  
尾虜逼州上命保通及潞曰貨糧之輶漢護陵芳其  
衛京師總兵胡鎮孫臏遊擊趙濤等逐虜于三河上  
日軍逐虜得無饑厚餉之虜與鎮戰斷其軍爲三臍

湊及軍三千人皆死焉遂大掠深東諸縣去諸將以  
精騎望虜塵尾之選以虜東退聞自詡追殺功上疑  
問徐階聞賊少退恐詐者選遂言追殺果行否階曰  
賊大屯在平谷謂之追送之則可謂追殺則否上曰  
此又庚戌之轍矣皇高祖考歲一巡邊皇兄亦聲威  
震彼今內逆欺而外賊侮可慨也博等會東有何奇  
方定策付諸將行如何以伸華威如何以報八害已  
已命戶部賑城中犒入援軍癸酉上審虜所以入繇  
楊選質通罕逮繫之并繫都御史徐紳密雲兵備副  
使盧益牆子嶺提調指揮楊瀛分守牆子嶺參將馮

詔延綏遊擊將軍嚴瞻分守通州參將胡燦等訊治  
之乙亥虜稍引去上諭楊博虜滿載去殺未半何以  
威將來十一月丙子朔上曰虜不聞耗二日矣連日  
風寒將士凍苦其速令勦與守用仲夏威仰承玄助  
丁丑虜遯京師解嚴是時上懲庚戌之變劄問徐階  
日數下已差戰功賞江東等有差子趙濤贈廕世襲  
立祠以孫贗先失事聽部臣再處之是役也博不及  
賞上曰朕不賞博博或積後釁如丁汝夔矣博惶恐  
階爲解乃罷告虜退于郊廟社稷神祇歷代帝王等  
廟虜之人也邊人以質通罕咎選左右家薦西者以

其言聞上上慍甚有意誅選頃之刑部擬上選及紳  
瀛皆坐死罪不報會兵科都給事中丘橒等上善後  
策上怒曰何不言逆囚選殺吏勾賊者下橒錦衣杖  
六十黜爲民餘降邊方雜職命改錄選等於詔獄鎮  
撫司錄上通罕恨選乃勾虜入寇卽選自勾虜也上  
下刑部改擬諭徐階欲改罪選語甚嚴切刑部尚書  
黃光昇惶恐請改選接引奸細律論死上命立赴西  
市斬而梟示之仍命流其妻子二千里如丁汝夔故  
事而紳瀛論死長繫之贍燉皆謫戍邊詔自今諸將  
入援與援薊鎮者徑聽薊鎮總兵指揮毋關白軍門

裁薊鎮宣府添設兵備官上諭楊博擇將練兵須集  
議來聞三衛夷導虜狂肆亦當一處分也上諭吏部  
尚書嚴訥京師兵本協理戎政當慎其人本兵二佐  
亦須才者朕見侍郎時協理戎政侍郎汝楠皆不稱  
卿訥其大破常調推歷邊習武者以聞乃以湖廣參  
政遂代時大理少卿恭代汝楠焉上曰昨風作有聲  
不以時令兵部其益謹兵火陣亡士卒暴原野者朕  
甚憫之其命有司瘞而祭孫臞之死猶有知罪畏法  
之意禮部可與恤典三之一更名新宮曰壽恩甲申  
火星逆行建禳典百官素服脩省五日乙未順次奏

謝于禳壇冬至羣臣望皇極門施藥朝天宮增設  
兗州通判于張秋鎮以捕盜十二月禁遼東通禡于  
登萊祈雪禁中命朱希忠代告于玄極太廟諭羣臣  
滌心脩省以迓玄庥不恪者禮部以名聞上曰自今  
月二十四日至來正二十日首欽大壇報繼重新甲  
曆以承眷佑其止封諸雜姓擾云新甲者以明歲爲  
甲子也

四十三年甲子正月乙亥朔命朱希忠攝拜天玄極  
殿羣臣望朝皇極門是夜大風上諭兵部曰風非四  
時之正上天恩示其慎承翌日又風上曰風雨異博

小心兵理若徒取往來文書何益於事楊博因請先嚴宣薦次各鎮上曰屢命之矣毋虛文取罪上諭戶部兩廣駕言苦倭莫留意採珠者雲南無事實石乃亦不至有司怠上如此矣祖宗時珠石貯積不少皆弘正間耗費今上無母后之奉十已省七有司見謂方理兵食則廢珍玩乎尚書熠與爲期促之愆者治其罪東虜犯薦東岸石黃土嶺參將白文智總兵胡鎮遊擊董一元等拒却之賊轉攻山海關亦不克而遁歸值海水暴漲有陷沒者上歸佑皇穹命祭于海神修惠熙宇華寶月殿亭舉慶祝星典萬法殿四日

以迎元甲薦遼再報虜警上諭兵部北氛之作未宜  
恃備內逆入虜者多于虜矣京營練兵亦宜整也上  
諭徐階鎮遠侯寰令整京練可耳故當別選副將一  
二可破敵衝鋒者增築甕城環京師外城城潞河二  
月雲南進寶石七百六十餘兩碎小不中命更採青  
紅色三寸黃色徑寸并紫英等石以獻量免順天三  
河被虜諸處稅糧賑之以緩金降伊王典模爲庶人  
禁高牆除世封福建餘倭攻圍仙遊縣總兵戚繼光  
追擊大破之復追擊之同安又追擊之漳浦大破之  
倭遜廣東而福建賊悉平建天保二祝景度典停常

封七日建春報大齋朝天宮三日夜閏二月命吏部  
侍郎兼翰林學士董份直西死舉歲祈典大高玄殿  
汀漳盜與江西建城寇合拒傷官軍漳平知縣魏文  
瑞死之賜贈官三月更名惠熙殿玄熙延年殿成廣  
東官軍擊潮州倭破之建景祝大典于太極殿九日  
己未親禱雨洪應雷宮甲子黃龍雨土命百官脩省  
九日遣府部大臣齋告南郊及朝天等六宮廟吏禮  
三尚書督察其不虔者四月庚辰雨羣臣表賀上悅  
賜祭告宮廟諸大臣金幣施藥朝天宮巡撫貴州都  
御史吳維嶽招土酋楊珂等降之五月壬寅朔日有

食之廣東進珠二千兩上少之命別選大珠兼替香木以獻分遣使者建醮鶴鳴諸山道士進香獄鎮海瀆以祝壽乙卯桃夜降于御幄上喜修迎恩典五日丙辰桃復降白兔生二子上益喜謝玄告廟頃之書鹿亦生二子羣臣表賀上以奇祥三錫天眷非常並手詔答之建洪法太素殿六月取太倉銀二十萬兩爲內供總兵俞大猷湯克寬大破倭於海豐廣東倭盡平七月南贛官軍討程鄉等處羣盜擒之雲南進寶石六百五十餘兩詔更採徑寸者以獻定王親官至布政使者考滿例八月三日醮大光明壇至于月

終停雜封御醫金聚芝三百六十六本爲萬壽香山  
三以獻賜白金是歲天下臣民進法秘仙桃瑞芝及  
爲上建醮祝釐者甚衆皆蒙賞賚以萬壽節加恩直  
贊諸臣進階賜級有差醮朝天宮萬壽節命朱希忠  
攝拜天玄極殿羣臣望朝皇極門大學士階等表賀  
上悅九月建秋報典于大高玄殿三日總督薦遼副  
都御史劉盡通潮河川于通州轉漕密雲鎮賜金幣  
巡按應天御史瑞言故莒州人孫鏗僑寓松江自具  
弓劍率死士百餘擊倭敗之追奔射殺戰死重圍羈  
旅之人捐貲糾黨以赴國難事偉報茂忠竟未懸浙

江守臣亦言嘉靖四十年賊犯龍泉縣人故巡簡黃尚正引鄉兵禦殺追奔見擒陰遣其養子進還約爲內應及期官軍不至尚正密入賊帳斬三渠首旋被支解進聞變奔號隨亦遇害乞加贈廕以勵方來兵部覆請皆許之十月王大任姜倣還報命皆陞翰林院侍讀學士賜第京師上諭法司曰今者甲元建歲會典舉修宜奉天賚不爲緩失應決罪囚其停刑繫獄如故建秋報典六日命戶部發銀五萬兩亟買黃金香料以進禁私鑄十一月嚴世蕃羅龍文逃戍而歸聚衆大治私第南京御史林潤以聞詔逮治之上

論禮部朕承皇眷遇甲元慶始之年建典迎恩其停  
刑禁屠止常封九日百官吉服蒞事命公張溶等告  
祭六宮廟冬至百官望朝皇極門修圓景預祝大典  
九日罷寶源局鑄錢更定歲貢法毋循廩次以求得  
人十二月命順天府官祈雪上責戶部所進金色不  
純尚書耀皇恐謝請進豆色金千兩自贖乃解上親  
祈雪洪應壇六日詔番僧入貢者限人入邊如成化  
弘治故事古田僮賊銀豹等劫廣西布政司庫殺參  
政黎民衷南韶山賊作亂流劫乳源江灣守備賀鐸  
納綏指揮蔡允元迎戰見執罵賊死賜贈蔭陞襲嗣

死所虜犯山西興嵐等處遊擊梁平守備祁謀死之  
予贈襲致祭立祠北畿山東大饑

四十四年正月己亥朔命朱希忠攝拜天玄極殿羣  
臣望朝皇極門賑畿內饑景王薨辛亥上不豫授法  
士秩文斌爲太常博士兼右演法中孚希濂太忻守  
貴爲協律郎兼左至靈二月丙子上瘳加銜太醫院  
使偉爲右通政使遂舉吉典于大玄都殿七日上諭  
徐階曰龍涎香常有耳耀所進銖稱不足尚加恩何  
更忽諸耀皇恐請趣廣東福建撫按官百方購之上  
曰爾母効染材誹慢爲龍涎香出蘇門答刺國其國  
西有龍涎嶺獨峙南巫里洋

之中羣龍交戲其上遺涎焉因人駕獨木舟伺採之  
每一斤值其國金錢一百九十二枚准中國銅錢九  
于文嘉靖三十四年下戶部取香百斤遣市京師不  
得下諸藩司採買部文至廣東臺司集議懸價每斤  
銀一千二百兩僅訪買得十一兩上進內驗不同始  
存之亟取真者部文再至廣州獄夷囚馬那別的貯  
有一兩三錢上之黑褐色密地都密地山夷人繼上  
六兩白褐色細問狀云黑者採在水白者採在山皆  
真不覺尋有密地山商再上通前共得十七兩二錢  
五分次年進入內辨驗是真許畱用自後夷舶聞上  
供稍稍挾來市始定價每香一兩價百金龍涎之爲  
用也入香合和能收斂腦麝消氣雖數十年香味仍  
在得其真者如香焚之翠烟裊空不散或言涎沫有  
三品曰汎水曰滲沙曰魚食汎水則輕浮水面善水  
者伺龍出隨取之滲沙則凝積多年氣滲沙中魚食  
則化糞散於沙積惟汎水者可入香用又言魚食亦  
有二種海旁有花若木芙蓉春夏間盛開花落海大  
魚吞之若腹腸中先食龍涎花落入久卽張悶昂頭  
向石上吐床乾枯可用惟費者不作

三月建金鑑大典大都玄殿七日

大明門內西千步廊火遣告郊廟社稷百官青衣辦事五日營崇臺殿亭復命壽恩宮曰萬壽遣奏告玄極殿壬子車駕還御之醮五日百官詣朝皇極門表賀嚴世蕃羅龍文逮至御史林潤再劾之下刑部讞上論死上曰世蕃蓄逆非常爾等皆不推究總掣潤疏如其說足示遠耶其會同都察院大理寺錦衣衛再鞫之尚書黃光昇乃上言世蕃交通倭虜謀逆有狀請亟正典刑以快天下上尚銜嵩曰曷不言逆本命卽斬世蕃龍文籍其家嵩諸孫在官者皆削職爲民虜犯遼東寧前小團山參將線補袞與遊擊楊維

藩死之賜贈官陞襲給殮金祠祀四月宮怪有黑氣  
木綿見披擋藻井上上惡之議內禪亦竟止建清馥  
殿詔歲貢吏員有治行卓異者一體超擢洪應殿成  
總督工事工部尚書徐杲爲其子求世襲錦衣僉事  
許之虜犯肅州總兵劉承業等戰敗之倭犯通州官  
軍禦敗之賊轉掠至江西三河副總兵郭成等追擊  
之海子沉其舟倭寇浙江溫台官軍擊敗之塲口竹  
輿逐出外洋還丙戌親禱雨洪應壇停刑禁屠五日  
百官青衣辦事己丑雨百官表賀詔安賊首吳平盜  
復起行劫兩廣福建間倭自台州海洋突犯福寧州

總兵戚繼光督參將李超把總魏宗瀚擊敗之乘勝  
勦舊犯永寧倭亦敗之雲南叛夷阿萬李向陽等平  
五月建雷軒虜犯鎮武營遊擊楊維藩擊之陷伏沒  
罷雲南鑄錢議方士胡大順故緣陶仲文以進仲文  
死坐斥至是更名以寧遣其子王玄隨妖人廷玉進  
水銀藥詭言呂祖示萬壽金書授以不老方因上所  
倖方士藍田玉羅萬象太監趙楹以獻上問以寧安  
在田玉等遂詐上旨徵之至則上書屢求見乃大順  
也命之箕曰不降問宮怪言二十一年宮變枉死者  
爲之亦坐藍道行下獄故有所使然上問階階言大

順等皆無賴小人田玉尤甚世蕃黨也木銀決不可  
餌箕降或有大較此曹非能究其術媾結上左右得  
上意或能答今猝不得故托不降宮怪久矣聖人所  
不道若夫詐傳微旨罪惡特深望聖明速斷上悟詔  
錦衣逮問送法司重擬之趙楹匿殿櫺中將爲大順  
伺間訴上大怒付拷司禮監與大順俱下法司獄論  
斬楹斃獄中上責尚書黃光昇逆囚不令肆市曹得  
自斃奪郎中良曙俸二月虜突入延綏黃甫川屯關  
城內外凡四日六月芝生睿宗舊廟上大悅命奏謝  
玄極殿告太廟百官表賀名舊廟曰玉芝宮奉睿宗

帝后御位焉以萬壽節建各壇醮停封八月終止七月施藥朝天等宮廟河決沛八月重建萬法殿及千步廊葬景恭王于西山虜入宣府尋趨大同新平天城堡口出邊廣東山賊卓文勝等劫掠乳源英德等縣南詔兵備僉事劉穩等擊破其三巢擒之西苑刈穀得嘉禾賜督理侍郎守直金幣陽曲生員登高獻白兔賜金幣遂告禾兔于太廟百官表賀建壽醮朝天宮三日夜萬壽節命朱希忠攝祀天玄極殿羣臣望朝皇極門上諭禮部曰頃者朕御禱若案上各有藥丸一天賜也朕親奏謝于太極殿溶等其分告朝

天六宮廟遂建謝瑞典于紫皇殿命大學士徐階嚴  
訥李春芳尚書郭朴高拱伯方承裕爲上香使督祝  
官道仍分詣各宮廟行禮建毓德宮福建把總朱璣  
協總王毫擊吳平海中陷沒詔閩廣鎮巡官督勦之  
虜酋黃台吉突入洗馬林把總江汝棟按伏暗莊堡  
擊之墮馬其部衆致死奪去黃酋歸數日始甦自是  
不敢犯邊者數年九月虜犯延綏鎮靖堡參將魯聰  
率指揮權世爵千戶李朝鸞等禦之俱敗死虜縱騎  
圍總兵郭江于魚山茆趙岢于黃家梁凡四日乃解  
去賜聰等贈廕立祠定親藩封仍用孟夏月建樂成

殿給事中舜岳御史振之等劾奏高燿貪黷脂韋不  
勝戶部上曰燿不聞過差近覓香買石少見獎遂被  
忌諸臣曰未聞求賢急於寶貨不無謗上燿其視事  
如故命工部尚書朱衡開新河沛縣虜聚衆威遠塞  
窺大同警報日數至上諭徐階曰昔我語嵩政隙而  
習武嵩云佳兵不祥古北口果欺犯茲邊警不次報  
博不預圖與其後成功也無寧過先籌建秋報大齋  
朝天宮三日夜交城王表相得白兔於藐姑射山撰  
頌以獻賜白金百兩金綵袞龍朱衣三襲十月告謝  
瑞鹿于玄極殿太廟增設饒州通判一員掌燒造御

器諸府宗祿不給吉王翊鎮瀋王恬校晉王新煥秦  
王懷塈慶王櫟枋奏辭祿千石以補之皆賜獎勅封  
趙世曾孫常清爲趙王先是胡宗憲爲言官所劾以  
書抵羅龍文轉求世蕃爲內援書未達會世蕃被罪  
及龍文誅巡按御史汝正奉詔籍其家得宗憲書因  
言宗憲故交通王直與援龍文世蕃以免今蒙恩放  
歸不思補過愈肆猖狂招集無賴暴橫鄉里其罪不  
在二犯下乞正明辟以服人心詔執宗憲京師詰問  
之久之宗憲逮至疏辯并許汝正私罪上心憐之下  
汝正弁訊宗憲尋死于獄詔已之戶部主事海瑞上

書極諫十一月御史張攢言頃皇上寘嵩世蕃于法  
顯陟鄒應龍以旌其直中外翕然稱快乃先年諸臣  
如吳時來董傳策張猶王宗茂輩皆首發嵩世蕃罪  
者今或雜戎行或流瘴癟臣竊痛之乞赦過錄用以  
厲直臣上大怒逮治之京師舉一陽大典于萬歲山  
壇冬至羣臣望朝皇極門韓王融燧薨十二月榮王  
載瑾奏減祿千石崇王翊鑄減五百充補宗祿皆賜  
勅褒獎上曰吏貪不治民不安州縣官贓多者皆先  
勒爲民巡按御史乃逮問之都察院亦以此稽御史  
功能焉內子禱雪于雷軒命百官齋三日丁丑以火

星逆行詔脩省是日大雪百官表賀定新建萬法寶殿名中曰壽懸左曰福舍右曰祿舍建真慶殿大玄都殿修懺禳大典于洪應雷宮三日建報歲大典于萬壽宮停常封至正月二十五日止

四十五年正月癸巳朔命朱希忠攝拜天玄極殿羣臣望朝皇極門改建真慶殿大風塵示楊博汎兵火大足縣妖賊蔡伯貫作亂尋平開化礦賊攻發源破之流劫德興玉山諸處陞真人府焚修製藥官王中敬爲太常寺少卿歐陽中衡李中陽陶倣屈存輝及內局高士包存蘭等皆加俸秩有差二月先是海瑞

上疏上怒擲之復取觀反覆太息如是者再四竟留  
中至是上疾頗憇諭徐階曰瑞言是也朕久病大不  
如曩者安能視朝今人心恨不新其政其政旣新其  
君御此尊無二上朕欲別建一宮居於南京又何貶  
焉階曰瑞誠慙顧殊無一語及傳繼事陛下奈何出  
此言且臣聞主聖則臣直陛下天地也何所不容乃  
下旨曰瑞畜物詈君不臣悖道錦衣衛其捕付鎮撫  
司嚴究主使同商者旣讞上法司擬予罵父者律絞  
竟畱中先是上居恒念承天以爲祖家與徐階及中  
官黃錦議南幸者屢矣至是會承天水溢睿陵墳牆

傾守備張方湖廣巡撫都御史谷中虛以聞上意益  
決手畫宮殿陞廡掖庭以及法門雷壇崇祀玄武之  
地規制一倣京師費以萬萬計卽遣工部侍郎張守  
直視工內官監太監袁亨督理工匠授副使參議鄭  
中爵號者餘二百人皆至楚中緹騎貂璫僨探稽督  
者相屬於道是時楚中連歲災荒人心恂恂莫知所  
出巡按御史陳省上疏不敢止上南巡乃極言湖廣  
水災民困死流離狀上心動下旨工部曰旣財歉水  
災想造作艱緩弗美其一切都停第速恭量修隆慶  
祿恩二殿畢之日督工官及工匠俱還京而上竟乃

已顧諭徐階曰朕病久不瘳承大將一詣承天朕受生之地拜親陵採藥焉必奏功諸王母朝迎從官勿朝我用臥輦至階諫不可居數日上復曰朕修理龍飛等殿圖一視之心乃唐階對陛下自南幸至今二十七年矣自度精力何如曩者四方無警塞陲晏然又何如曩者六飛遠狩根本空虛萬一叵測得無驚虞惟陛下深思上乃罷而意猶不擇時時念郢中不置云戶部進黃白玉五百餘斤命多訪買黃色以進并採大小珠一號至十二號者承天大志成造御憇等殿於大道殿果園中四川山寇黃中平三月虜突

犯宣府龍門等處總兵馬芳等追襲勝之廣東山賊  
李亞元等毒掠河源和平諸縣原任總兵俞大猷直  
搗其巢大破平之戶部進珠百三十八兩有奇命再  
取進六號九號者六號者五千顆九號者二萬顆取  
太倉中庫永樂宣德中舊銀十萬爲內供開化賊還  
掠遂安與西安新賊相應勢日熾陞浙江巡撫都御  
史劉畿爲兵部右侍郎兼都察院右僉都御史總督  
浙直江西軍務徵三省兵亟勦之四月壬戌朔日有  
食之參將湯克寬都司傅應嘉窮追吳平寇入安南  
大破之以繫極殿壽清宮成遣謝郊廟社稷舉典于

內壇百官表賀先是有所旨清理京師舖行時錦衣官  
較多占籍行戶者大興知縣世儒等以詔書名之承  
役左都督朱希孝言禁衛親軍例當優免世儒奉詔  
無狀擅勾問之御史顏鯨言禁軍依憑城社操奇贏  
晏然吏不得問其尺帛銖金世儒等名行戶非勾禁  
軍也希孝庇羣小撓法市恩不忠之大者上責鯨輕  
訛勳臣降雜職外調之封淮世子載培爲淮王虜冠  
遼東西興西平二堡備禦苟麒把總張祿死之五月  
虜轉掠河東鹺塲等處守備郎得功擊勝之張能峪  
口驅還擄掠甚衆趣採珠廣東礦金銀寶石於雲南

六月太醫院吏目乾獻白兔告謝玄極太廟百官表  
賀舉天保玄修醮於內殿至八月終止戊寅親禱雨  
凝道雷軒越三日大雨羣臣表賀七月諜報虜自萬  
全右衛入寇命亟檄宣大薊遼預戰守并令大同伏  
兵天城陽和間伺擊之上諭博曰夏炎虜入必難得  
志但當防秋耳已總兵馬芳與諸將逆戰捷聞論功  
有差修玄極寶殿暫遷上帝睿宗神位於咸福宮購  
西域賈胡玉以造御寶永和王新壇獻白鹿遣祭謝  
成福宮告太廟百官表賀虜大掠延安府及保安定  
塞諸縣數日乃出始通天津海運轉漕永平八月進

封敬妃文氏爲貴妃宮御尚氏爲壽妃萬壽節命駙  
馬都尉詔代告內殿公希忠代祭天成福宮羣臣望  
皇極門表賀西苑生瑞穀獻廟羣臣表賀命工部速  
建紫宸新宮迎冬至一陽入居必亟之虜寇延安九  
月修乾光殿以玄極殿畢工奉安上帝睿宗神位如  
故修咸福宮常銀豹等平以更建新宮祈祐于紫極  
殿五日增設廣東巡撫改總督軍門爲總督兩廣軍  
務兼理糧餉巡撫廣西召還鎮守勲臣以流官都督  
填之復設鎮守廣東總兵十月戶禮二部進綠玉盈  
尺者三上諭高擢曰三玉不澤不堪作寶若重曠之

夷賈當得美者其求白漿水碧二色以進復示燿大  
小珠一函及甘黃玉刀鉞一具使如式求之謫嚴嵩  
親黨故大理卿萬案戊逮問故刑部右侍郎鄢懋卿  
于巡按御史虜繇定邊入寇固原總兵郭江千總李  
大本死之賜江贈謚祠廮虜入偏頭關殺守備一人  
及官軍甚衆癸酉月食以方大建紫宸且歲多災異  
暫免刑囚淮徐饑賑之戶部司務何以尚請宥海瑞  
上大怒詔杖之百下鎮撫獄晝夜禁出沈東發爲民  
御史王時舉論劾刑部尚書黃光昇擬海瑞罪失律  
編發之口外命兵部檄總督亟勦定邊虜丁亥上復

不豫訖于大漸閏十月劉畿遣都指揮陳大成成大  
器等分勦開化礦賊平之虜復犯延綏往內地六日  
乃去紫宸宮成告謝玄極寶殿內殿百官望朝奉天  
門表賀雲南四川兵討雲南土舍鳳繼祖平之命高  
燿買黃金四千兩以進上曰金玉珠寶王侯制度非  
不經也思爾職無避怨已燿用白金二萬二千五百  
餘兩購進大小珠千五百餘顆凡四等上曰未如數  
抑無甘黃玉其母慄直亟之虜千餘騎犯大同威遠  
等處參將崔世榮引兵二百禦之殊死戰不利及其  
子大朝大賓死之各贈官祠祀如故事舉一陽大典

于萬壽山壇十一月冬至羣臣望朝皇極門表賀命  
有司祈雪乙丑雪羣臣表賀修顯陵祾恩殿成更碑  
題曰大明睿宗獻皇帝陵十二月改龍州官撫司爲  
龍安府割江油二縣隸之設隆昌海澄寧洋三縣庚  
子上疾甚還乾清宮遂崩遺詔曰朕以宗人入繼大  
統獲奉宗廟四十五年深惟享國久長累朝未有乃  
茲不起夫復何憾念朕遠奉列聖家法近承皇考身  
教一念惓惓本惟敬天勤民是務祗緣多病過求長  
生遂致奸人乘機誑惑禱祠日舉土木歲興郊廟不  
親朝講久廢既違成憲亦負初心天啓朕衷方圖改

輒遠憂疾病補過無緣每一追思惟增愧恨皇子裕  
王可卽皇帝位勉脩令德勿過毀傷喪禮如舊以日  
易月祭用素餚母禁民間音樂嫁娶郊社等禮及朕  
祔葬享各稽祖宗舊典斟酌改正自卽位至今建言  
得罪諸臣存者名用歿者恤錄在繫者卽先釋放復  
職方士人等論厥情罪各正刑典齊醮工作採辦諸  
勞民事坐行停止於巖子以繼志述事兼善爲孝臣  
以將順匡救兩盡爲忠當體至情用欽末命詔告中  
外咸使聞知裕王入發喪尋上尊謚爲欽天履道英  
毅聖神宣文廣武皇仁大孝肅皇帝廟號世宗葬永

陵

臣喬遠曰臣每見故緝紳父老若爲郎時尚接先朝  
皆御之臣多好言嘉靖時事其謨猷合聖賢動作掀  
天地眞中興之主矣晚節西苑崇玄帝心固以爲敬  
天雖萬幾在宥而精神無時不運於天下者四十餘  
年如一日所以饗世獨久歟

名山藏卷之二十九

臣何喬遠恭輯

典謨記

穆宗莊皇帝

穆宗皇帝御諱載，世宗皇帝第三子也。母杜太后。帝嘗盤之日，首取龍旗，畫鼓及五行志，每吼輒進。世宗世宗奇之，長而丰神秀朗，舉止端莊，見者謂有帝王之度。始封裕王，與莊敬太子同日受冊。中官誤送皇太子冊寶，帝所而裕王冊寶乃在太子宮。是時莊敬已屬疾，竟薨中宮曰：「天所啓也。」世宗兩立太子，皆

薨其後春秋高益惡言立儲事諸方士有言於世宗者曰二龍不相見於是帝仍爲王出居邸者十餘年絕不得召入中外莫測屢有言者然而世宗意固自定世宗末年海瑞上疏切直上私命錦衣母死之世宗崩乃入踐天子位焉是爲嘉靖四十五年十二月壬子頒詔赦以明年爲隆慶元年出戶部主事海瑞

獄中

元年正月丁巳朔上拜天宮中祭大行皇帝几筵免朝賀戊午上衰服視事宜治門吏部奏先朝得罪諸臣如通政使樊深都給事中丘橓楊思忠尹相魏良

弼李用敬左給事中陳瓚右給事吳時來周怡沈東  
顧存仁張選趙軌袁世榮御史何維柄趙錦張登高  
黃正色方新張樞凌儒申仲王時舉馮恩郎中徐學  
詩周冕主事張翀董傳策劉世龍唐樞大理寺正毋  
得純等凡三十三人宜遵遺詔錄用報可吏科分諸  
臣以建言死者爲三等一等戮死其次廷杖死者其  
次繫獄戍邊廢斥謫下死戮死者宜復職贈廕厚諭  
祭之典則有若員外郎楊繼盛左中允郭希顏錦衣  
衛經歷沈鍊給事中楊允繩廷杖死者宜復職贈廕  
則有若太僕寺卿楊最編脩王思給事中薛宗鑑何

光裕裴紹宗張原御史浦鉉曾翀葉經主事周天佐  
仵瑜臧應奎殷承叙繫獄戍邊斥死牖下者宜復職  
贈官則有若左侍郎唐胄御史李璋學士豐熙脩撰  
楊慎編脩楊名簡討王元正贊善羅洪先大理寺左  
少卿徐文華都給事中張翀張侃劉濟劉琦御史馬  
錄程啓充盧瓊陳讓桑喬包節王宗茂余翹方一桂  
員外郎劉魁郎中余寬黃待顯陶磁相世芳王與齡  
僉事章鑰若故吏部尚書熊浹故御史楊爵風節尤  
著雖斥黜當與杖死者一體卹錄從之掌詹事府畢  
吏部左侍郎陳以勤上謹始十事嘉納之罷祈穀大

享神祇壇帝社帝稷諸祭禁民間放燈出鄭王厚烷  
鄖陵王府鎮國中尉勤熒及其子朝璫於高牆復其  
爵位厚烷加歲祿百石勤熒父子存卹於有司罷苑  
田除戶部侍郎加督理農事銜省徵派黃白蠟如嘉  
靖初之數停止採辦香品方士金等下獄論死甲戌  
賜皇子名曰翊鈞丁亥上大行皇帝尊謚丁丑上孝  
恪杜皇后尊謚詔天下削奪故真人邵元節陶仲文  
爵誥毀其坊牌墓碑籍田宅撤西苑大高玄等宮殿  
亭臺名額吏科都給事中胡應嘉諭劾吏部尚書楊  
博考察不公黜爲民科道官諭拔外調之二月戊子

祭太社太稷樂懸封皇親杜繼宗慶都伯李銘德平  
伯陳景行固安伯罷祭金海宣靈弘濟之神襄王厚  
頌薨乙未立陳皇后辛丑上孝潔陳皇后孝烈方皇  
后尊謚甲辰加謚元妃李氏爲孝懿皇后故世子爲  
憲懷太子罷玉芝宮歲時享祀日供膳如舊議錢法  
虜犯延綏副總兵黃濱死之贈廕立祠三月壬申奉  
葬世宗永陵遷祔孝潔孝恪二太后世宗梓宮行上  
舉慟顧望甚哀丁丑升祔于太廟更名景雲殿曰弘  
孝殿奉遷孝烈皇后神主專祀孝恪皇太后主於神  
霄殿以孝懿皇后祔享焉己卯上始御皇極門視朝

如故事冊封皇子母李氏爲貴妃虜犯遼陽長安堡  
指揮王承德死之贈官予陞襲四月南京科道官以  
考察拾遺并劾大學士高拱上曰閣臣拾遺無故事  
切責之毀紫極殿紫宸宮改建翔鳳樓焉工科都給  
事中馮成能等言山陵甫畢不脩政事而亟翔鳳詔  
令不信舉動不當從此始矣一毀一建爲費不貲伏  
惟遠希漢文靈臺百金之愛近法宣皇草舍一區之  
德上嘉納遂罷之兵科給事中魏時亮請宮中節佚  
遊寄精神省章奏便殿與閣臣面裁決下所司黃塵  
四塞始命祭方澤時用卯丁未初御經筵復駒馬都

尉鄖景和官廣東參政郭應聘督兵攻廣賊張紹南  
黃仕良有斬獲賞銀幣追贈故新建伯南京兵部尚  
書王守仁爲新建侯謚文成賜祭七壇復賜太保左  
都督周尚文少傅兼太子太傅戶部尚書謹身殿大  
學士蔣冕少保兼太子太保吏部尚書喬宇禮部尚  
書汪俊太子少保戶部尚書王果刑部尚書喻茂堅  
詹事府少詹事黃佐呂柟太子太保吏部尚書武英  
大學士石璫等贈謚祭葬有差改石璫之謚曰介追  
奪尚書顧可學徐可學侍郎朱隆禧郭文英贈謚誥  
命作其諭祭等碑五月工部尚書朱衡鑿新河以通

運河成辛酉祀方澤復故刑部尚書吳山職以擒  
廣西賊首王西橋等陞總兵官俞大猷爲署都督同  
知提督侍郎吳桂芳俸一級幸舊邸罷採鮮寶坻等  
縣自今薦新上供辦納光祿寺毋得奏遣內官著爲  
令遣御史四人分行天下驗視倉庫多寡有無籍記  
爲二一進御覽一備戶部其有冒破營私毋論歲遠  
近官大小悉劾治廣東道試御史齊康論劾大學士  
徐階降二級外調之階求退不許廷臣多論劾大學  
士高拱拱乞致仕許之勅脩世宗實錄六月許羣臣  
秩滿贈生母是月雨不止諭戶部曰淫雨傷稼內外

其痛加脩省勘灾以聞戊戌上素服避殿視事皇極  
門復故少師兼太子太師吏部尚書華蓋殿大學士  
楊廷和太子太保戶部尚書梁材太子太保兵部尚  
書聶豹王廷相翟鵬太子太保刑部尚書林俊刑部  
尚書劉訥南京工部尚書吳廷舉兵部侍郎曾銑楊  
守謙萬大節張漢工部右侍郎江曉南京工部左侍  
郎程文德右副都御史孫繼魯南京國子監祭酒鄒  
守益等原職賜贈官及祭葬謚廕有差七月諭內閣  
曰朕卽位以來賴卿等輔弼利道官不諳事屢肆欺  
言卿爲朕詳處大學士徐階言科道官遭際昌時思

勅報答言或過當事或風聞誠如聖諭以臣度之非  
敢爲欺臣請示之上已不復令處置御史李惟觀疏  
言皇上卽位以來首錄建言得罪諸臣官民利弊許  
直言無隱甚盛德也頃者京師霖雨爲灾宣大地震  
淮徐水溢遼東旗鎗火民間金釜鳴一時臣工畢智  
效忠仰承宵旰而皇上過生疑慮逆折讜言非所以  
恭天示一衆聽也工科都給事中馮成能復極言聖  
明之世不當諱言上報曰聽諫朕心昨諭有謂爾等  
自後進言宜審以稱朕意追復故太子少保吏部尚  
書兼翰林院學士李默原職賜祭葬贈故左春坊右

贊善羅洪先兵部員外郎楊繼盛光祿寺少卿賜謚  
子繼盛啓上諭吏兵二部薊鎮邊牆圯脩築如何此  
外別有禦虜長策否其亟推才望大臣一人行視之  
并講求便宜聞於是遣兵部侍郎遲鳳翔兼都察院  
右僉都御史賜勅往上諭禮部霖爲民灾朕深憂惕  
內外百官痛加脩省順天府祈晴焉因避殿視事罷  
南京振武營諸選募孝陵衛餘丁千餘人並分隸大  
小教場神機營身終勿補諸將家丁及前尚書李遂  
所調淮揚民兵俱散遣之八月癸未幸太學予太子  
太保兵部尚書彭澤刑部尚書顏頤壽南京工部侍

郎何孟春太僕寺卿楊最御史石金俞希禮等贈官澤孟春最加祭葬及謚太常寺少卿周怡上疏忤旨降爲山東僉事癸巳初御文華殿日講贈故戶部員外郎印良給事中張達常泰右春坊清紀郎周鈇官吏部請卹錄故光祿寺少卿馬從謙上獨不許曰從謙在先朝乃犯子罵父也上將詣陵太學士徐階等言陛下念弓劖之藏切霜露之感甚盛甚盛第重宗廟安社稷天子之孝也故龍輶發引送且不親累朝之典山陵春秋之事遣官而已今東西虜日夕窺伺薊遼宣大警報屢聞惟陛下慎重上曰如旨階等復

諫上不悅責之階等復奏天壽山北黃花鎮與虜一  
牆之限而已頃有邊報言東虜且犯喜峰西虜且犯  
古北萬一奄至皇上不知何所捍仗臣實計聖躬實  
計宗社無所逃死不能奉上命上悟乃止九月命太  
監呂用高相陶金坐團營兵部尚書郭乾執奏曰不  
可革團營復二祖三大營之舊先帝所定也官有定  
員毋用內侍國家之典也上曰朕觀大明會典有之  
其草勅如命科道官皆諍階等言今無所謂團營者  
中官坐營起於景帝革於世宗會典脩於正德之季  
未及嘉靖臣望陛下以世宗爲法以兵政廢隳爲慮

言官言是上不悅詰階等階等復割先帝懲戎弛考  
太祖舊革團營名還坐營內官事權乃以一操練乃  
以效此善經也若據今則無營可坐必用內官則當  
盡變先帝制上納之革冗官種賊久據古田縣命總  
兵官俞大猷會勦之上曰北虜俺答入寇大同井坪  
邊進至山西偏頭關老營堡驅皮窖等處巡按御史  
已奏聞總督鎮巡等官其嚴戰守毋怠俺答寇石州  
陷之殺其知州總督鎮巡王之誥請身率宣府遊兵  
二枝西援鴈門許之虜酋土蠻寇薊鎮大焚掠昌黎  
等縣西虜黃台吉亦擁兵窺陵後南山命薊遼總督

劉燾總兵李世忠巡撫耿隨卿東禦土蠻昌平總兵  
劉漢西防黃台吉遣京營左參將陳良佐遊擊將軍  
邵勇護陵召王之誥於鴈門還駐懷來巡撫曹亨自  
保定移兵通州以備之上曰虜寇深入力戰者重賞  
兵部其懸格薊鎮虜尚畱壁石州間掠交汾等處發  
宣府保定延綏等兵分抹之京師戒嚴十月乙亥上  
問大學士徐階石州之陷故諭令選將調兵加意防  
守丙戌虜遁以虜入山西薊鎮逮繫總兵申維岳李  
世忠巡撫耿隨卿王繼洛副將田世威參將吳寶等  
已黜隨卿爲民發世忠繼洛戍維岳世威實論斬革

遼王真人道號金印賜故兵部尚書翁萬達兵部左  
侍郎陶諧吏部左侍郎董玘葬謚下前宣大總督都  
御史楊順巡按御史路楷獄論死奪虜謀犯固原鎮  
守寧夏總兵雷龍等出塞破之上諭徐階東西二虜  
荼毒甚卿其會議以聞禮科給事中陸鳳儀上疏論  
邊引聖諭有所改易上怒其不敬點爲民十一月命  
詞官葺郊祀禮以進郊久廢臣民快覩焉戊午車駕  
視牲庚申誓羣臣告郊于太廟癸亥祀圜丘奉皇祖  
配還御皇極殿百官行慶成禮廣東海賊曾一本執  
澄海知縣濬焚殺潮州革總兵湯克寬任改隆慶殿

爲慶元殿隆慶州爲延慶州衛爲延慶衛免石州徭役三歲旱禱雨命兩京大臣及科道官博訪邊才及熟曉屯鹽利弊者各舉所知以聞上曰有司怠位聽訟弗親槩委所屬武職及異途小官百姓受害良苦撫按官其指名奏治賜故禮部侍郎何瑭謚復故大學士夏言職工部主事楊時喬言三幾九弊三勢以規時政曰勤朝講爲脩德之幾裁章奏爲出令之幾斷聽言爲圖事之幾治體之弊怠弛法令之弊數易賞罰之弊溫納鬻之弊多用度之弊繁莊場之弊擾習俗之弊侈士氣之弊卑議論之弊浮宦寺之勢重

難制宗藩之勢祿難給邊境之勢威難振下所司上  
問內庫太倉錢穀之數戶部尚書馬森具對且言積  
貯天下大命也蓄無三年命曰非國令催徵急矣摵  
括窮矣事例開矣四方民力竭中外庫藏空矣臣謂  
生財不若節多取不如儉皇上登極首詔止土木之  
工罷珍寶之市損無益之費捐不急之官天下喟然  
歌誦書曰慎乃儉德惟懷永圖慎儉美德也懷永圖  
終也惟陛下終儉上曰帑藏罄乏至此朕正供外分  
毫無妄費朕儉矣卿等悉心求足國者鹽山丞王邦  
直應詔言十事曰減賦役以招流移實倉廩以備凶

荒戒有司以去奢侈清驛逸以革冒濫禁勢豪以除  
橫暴正士途以塞奔競重功績以明考課慎作養以  
剔繁冗嚴簡練以脩武備振紀綱以勵風俗上曰邦  
直言切所司議奏母廢官卑賜故戶部尚書徐問謐  
追復太子少保吏部尚書萬鏗都察院右副都御史  
江湖監察御史郭弘化王時柯刑部郎中胡璉兵部  
主事余禎官有加贈鏗潮賜祭葬是歲減免天下田  
糧九百九萬八千六百九石有奇

二年正月辛亥朔上拜天宮中謁奉先殿世宗皇帝  
几筵弘孝神霄二殿朝上曰貪官罷黜不足戒今歲

考察職著者部院奏治之戊午享廟遣代大學士徐  
階諫乃親享革正一真人名號奪其印以其裔孫張  
國祥爲上清觀提點吏科給事中石星言治道不進  
則退君心不強則偷今四序更始萬國維新庶職來  
同群心屬望苟因循玩愒卽欲長如隆慶元年亦不  
可冀切見皇上入春以來天顏漸癯視朝漸稀章奏  
頓閣宴遊屢肆臣不避斧鉞條上六事曰養聖躬人  
主一身至重也節飲食寡嗜慾所以養之也皓齒蛾  
眉伐性之斧甘脆肥釀腐腸之藥爲鰲山之樂則必  
長夜縱飲縱長夜之飲則必聲色是耽此陛下近事

也臣願陛下法大禹所以惡疏學成湯所以不邇曰  
講聖學我祖宗經筵日講之制定舉二月中旬法天  
運之新進德思治不可懈也言官累請未見舉行臣  
恐倏夏倏秋歲月逾邁而光明不緝也曰勤視朝先  
帝二十餘年不出宮闈而天下治紀綱振也元宵聖  
節爲日相比陛下宵旰倦於曩者臣恐獻諛之徒或  
借先帝爲解是以娛樂相尋萬事叢脞何以幾幸先  
帝之治也四曰速僉允皇上卽位初年臣下有言未  
嘗不允允未嘗不速也事涉難從旨亦旋下今則有  
允不允者矣卽允者亦愆常候臣嘗因而數之事閑

聖躬率留中而不報事關內臣或稽遲至得罪是豈  
愚言拙計不當聖心耶抑左右遏抑之也曰廣聽納  
切見太常寺少卿周怡言事誤犯忌諱遷之外吏給  
事中陸鳳儀偶遺聖旨斥爲縉民二臣得罪其小者  
也引裾批鱗有大此者矣曰察讒譖孔子曰浸潤之  
譖膚受之恕不行焉可謂明也已矣比有一二內臣  
專恣亡忌因言官攻發遂切齒怒目待其後言過直  
則對陛下曰欺過激則對陛下曰慢再三言之皇上  
不覺納而發之怒怒而譴責加焉臺諫去內臣益亡  
忘皇上之明損矣當今背理傷道之事尚多六者皇

上身心急務也願亟圖之疏入上曰訕杖而黜爲民  
大學士張居正言皇上登極之初特詔求言大小臣  
工莫不欣幸貢所聞知自古順言易從逆耳難受能  
受逆耳主德斯隆昔漢光武殺直臣韓歆皇上在藩  
臣嘗以進講其時反覆開導言人臣進言之難歎惜  
光武不能容歆荷蒙皇上改容傾聽遂御書文武獻  
納四字置之座側是皇上因臣之言有意遠追堯舜  
之治也石星草野之人乍被選用急于圖報旣杖之  
矣又褫職爲縉氓恐與昔時所以感悟臣言者不無  
差間伏賜召還或從謫外以倡敢言開自新不報二

月皇第四子生大學士徐階考九年滿加如伯爵俸  
廕一子錦衣賜勅若宴階三辭伯俸及宴許之賜楊  
繼盛祠于保定曰精忠勅諭天下朝覲官曰朕卽位  
之初下詔更始念得循吏究宣恩澤顧在位者苟且  
便私民用愁怨朕甚憫焉維茲來朝特命審覈黜不  
職甚者爾等宜幡然永思廉以律己仁以撫民公以  
存心勤以蒞事脫狃於舊習殷民自封私咈公佚廢  
勤是從事不恪而守官無狀也朝憲凜凜譬踐春冰  
尚欽承之母替朕命吏部廷舉邊才奏上大理卿鄒  
應龍等六十三人因言五方之氣雖篤于因才百中

之能難拘于器使如往者輔臣楊一清南人也用陝而効尚書王驥北人也用滇而功請母論地資期得當才上曰善有不稱坐舉者賞擒斬貴州賊楊珂功已亥耕籍虜犯柴溝堡守備韓尚忠迎戰死之予贈官陞襲立祠賜祭吏部左侍郎兼翰林院學士趙貞吉遷南京禮部尚書將行上獨心焉諭徐階曰講官林嫌其調之南講臣中有齒長者畱如舊階對曰趙貞吉也請召還爲禮部尚書物管詹事府事上曰可設總理鹽屯都御史二人分隸鹽屯事改石州曰永寧戊午謁陵已酉諭輔臣曰朕始知陵近邊薊州鎮

臣來朝言近日虜情何似邊事久壞無實心整理者  
卿等其示朕意於宣薊二鎮臣二鎮軍來護從者議  
賞之令諸總督鎮巡條上戰守方略因發金五千以  
犒軍諭戶部車駕所過量免本歲田租覈昌平州宛  
平大興二縣地凡設行宮屯軍馬除馳道者免十之  
五所過者免十之三民居被毀者與之直三月命太  
監佑督蘇杭織造工部言取還織造內官明詔也願  
毋渝信損儉德焉上曰有成命科道官亦以爲言上  
曰有旨辛酉立太子廣東賊曾一本犯雷州執參將  
印把總尚志以去以廣東總兵俞大猷往勦之以昌

黎撫寧二縣被虜免其賦糧一歲上欲幸南海子徐  
階等言上林苑海子蕃育禽獸而已非如視學耕籍  
足脩禮而明教也惟皇上慎重不聽九卿科道官皆  
諫報聞丙子車駕至而遂還京師地震命百官脩省  
四月閏清縣教諭葉春及應詔上萬言書報聞定勳  
戚莊田額勳臣傳派五世者限百頃城畹限七百頃  
家絕及失爵者悉歸官奪故元佑宮供田以其歲入  
堤江漢命內承運庫太監崔敏買黃金萬兩取戶部  
銀如金數而六之戶部尚書馬森言皇上出內庫知  
太倉匱矣先帝時常買金二千金色不佳僅得足數

亦尋罷之今猶貯太倉也抑祖宗時御札皆司禮監傳下內閣轉示部院無徑從中更望陛下慎重上命取太倉貯金以進延綏等鎮總兵爲事官趙岢等出塞捕虜斬首六十七級命復岢官賞賚總督王崇古等有差大學士徐階請疾甚力上遣中官至第諭之曰卿何舍朕階感激謝遂出五月廣西獵夷黃豹等據貴州程番府麻嚮大華等同時出鹵掠官軍勦之遁去以戚繼光署都督同知總理薊遼保定練兵事務遣錦衣二人募鳥銃手三千人於浙江給善器恤其家屬優其資用以防秋上曰諸臣皆言王守仁功

其遵先帝所封伯爵予世襲詔送刑部贓罰於戶部  
以濟邊著爲例名皇第四子曰翊鏐丙寅祭方澤上  
欲織造於南京供應機房下工部花樣四函工部遣  
人之南京莫主者因請令南京織染局太監安兼理  
之上命太監趙玢往工部覈言玢方取回又使兼理  
令不信也所庫業知供應機房無人謾令臣等齎送  
其意欲復遣官而詭計以欺陛下陛下幸聽臣言上  
曰爾言供應無人遣人矣又阻之玢亟去工科都給  
事中枝請如部議弗許兵科給事中陳邦顏言屬者  
陛下詔脩弭中官織造一月兩出部臣不得止科

臣不得諍上下變服名爲脩省徒彈文矣願陛下亟  
罷玢遣母因元元以益天怒上罪其抗瀆奪二月俸  
七月上諭輔臣去歲失事邊臣朕悉從寬宥今秋防  
近矣卿等示兵部申飭協心共濟毋縱虜如前違者  
寘重典巡視中兵馬司者御史學道有內使手刃嚇  
人財學道笞焉內官交忿朝退梓而羣挺之上聞大  
怒命杖爲首者百戌烟瘴餘降杖充軍孝陵衛學道  
亦外調之盜入廉州城劫庫傷官南京戶科給事中  
張應治等條上弭灾七議中勸革內批罷遊幸召還  
織造內臣上不憚下所司兵部覆請切責焉大學士

徐階致仕廣東賊曾一本寇省城拒傷官軍切責總督張翰令總兵俞大猷郭成等立功自贖八月雲南叛酋鳳繼祖伏誅先是參將吳昂率家丁與虜戰牆子嶺敗沒事聞給棺具御史劉翹言昂挺身徇寇畢命窮沙吏議見挫僅從薄賞是軀命等數金觀望賢一死非所以勵邊臣上曰其贈昂都督僉事被虜降人白春等五人來歸授附近衛百戶賞白金五十兩仍懸被虜降人賞格於邊外陝西盜魏大清等行劫絳州鄉寧太平等縣拒傷官兵尋渡河遁去湖廣饑命守臣蠲恤大學士張居正言天下事慮之在詳行

之在力謀之在衆斷之在獨竊見朝廷之間一事也  
而甲是乙非一人也而朝繇暮跖前後毀譽自爲矛  
盾是非淆唇吻用舍決愛憎臣謂無全利無全害者  
事之形有所長有所短者人之才權衡斟酌委任責  
成者君之道也今始也未熟計而以人言行終也靡  
定持又以人言罷加以愛惡交攻意見橫出讒言微  
中蜚語流傳尋莫究端聽不勝眩是以人懷疑貳動  
見譖張虛曠歲時成功難睹語曰多指亂視多言亂  
聽最當今大患也伏望皇上主張化機勵精實効審  
事於初旣行以斷慎人於始旣任以專一切章奏勅

部院衙門務從明簡是非可否直陳陛下之前以仰體省事尚實之意是謂省議論人主能使天下服從其教令者紀綱而已綱如網之有繩紀如絲之有總故詩曰勉勉我王紀綱四方臣見比者上下姑息百事委徇稜模而曰調停遷就而曰善處法之所加惟下於微賤禮之所制及上於朝廷玩習既久驟然振之必將曰此拂人之情務爲操切者也夫徇情順情名同實異振作操切事近用殊臣請有以解之徇情者惟情是便順情則因而公之也民好民惡之謂也操切者嚴峻爲虐振作則肅而憚之也道德齊禮之

謂也伏祈皇上奮乾普離握憲貞度不愆乎私情毋  
紛於浮議是謂振紀綱臣聞君者主令者也臣者行  
君之令致之民者也君不主令則無威臣不行君令  
而致之民則無法大亂之道也天子號令譬之風霆  
風不能動雷不能擊無貴造化矣故事章奏奉旨有  
某部看了來說者幾事之大也有某部知道者民務  
之習也有特降勅諭者睿聖之獨也大者不可以須  
臾習者不可以日月發自聖獨者風霆也邇乃槩從  
停閣或已奉欽依故紙視之或應勘應報奉旨行下  
在外有司多者積數十年遂使文書人證茫昧變遷

奉舟有漏覆益多寃是非賞罰得不紊乎伏望勅下  
部院諸臣奉旨事務數日之內卽行題覆若其了然  
易見不用撫按議處者便據理剖分有合行議勘問  
奏者酌緩急遠近嚴與爲期註銷稽久以違制論是  
爲重詔令世恒才也而用不得其道如得其道舉天  
下事惟上所欲爲無不應者今也稱人才不必試之  
以事任人事不必更考其成僨事之時又未必明正  
其罪椎魯少文以無用見譏大言無當以虛聲叨譽  
倜儻伉直以忤時難合脂韋逢迎以巧宦易容或卑  
微也而忽之或名高也而尊之或一事之善終身以

爲資或一動之差衆口以爲訾又有一種風尚士大夫務爲聲稱舍其職事而思出位建白條陳累牘連篇覈其本業名實茫然吏道耗廢不亦宜乎臣願勅下吏部遵祖宗之舊凡京官考滿皆先審覈殿最詰命勳階次第量與稍示激勸毋槩引復職溢給朝恩毋繁於更調毋驟於遷轉毋拘於資格毋淆於毀譽用舍進退一準功實是謂覈名實自古極治之時不無夷狄盜賊之患惟百姓安樂家給人足雖有外患邦本自固若愁苦怨思元氣索然夷狄盜賊乘之起矣皇上卽位元年蠲賦一半國用邊費遂見蕭然不

不得已差四御史分道督賦三都御史清理屯鹽皆一切權宜之計而遂見搜括外藏空虛水旱灾傷視民死而不能賑兩廣軍兵供餉百出而不能支元氣耗已夫善養生者不戕嗜欲而博節愛惜則雖戍削之人足却病而延壽善養民者不擾征求而加意儉省則雖空虛之國足固本而厚下當此民窮財盡之時凡不急工程無益徵辨臣謂當痛加節省一切停罷仍乞勅下吏部慎選良牧不次擢用守令上考必其端潔慈祥者雖有才苟止與中考貪汙顯著者令所坐贓輸邊自納以爲固圉一助不必引例發遣又今

風侈靡服舍無限豪強兼并賦役不均奸徒欺公侵  
損冒破錢穀漫無稽實胥吏因而滋奸此皆耗財妨  
政之大者若勅下戶部講求隄防之術何必索之勞  
苦之民自憲國家之元氣乎是爲固邦本今事可慮  
者莫重邊夫虜禽獸也不一創之患不止直須從容  
審圖計勝之耳臣謂今兵不患少也患弱軍伍之籍  
固存也若按籍徵求清查影占募補訓練何患無兵  
食不患不足也患耗損無用不急之費併其財力以  
撫戰鬪之士何患無財將帥不患不得人也患無以  
鼓舞之懸之重賞寬以文法何患無將夫惟皇上赫

然奮發屬任謀臣脩舉實政不求近功不忘有事熟  
計而審行之不出五年虜可圖矣至於選擇邊吏團  
練鄉兵守墩堡令民耕牧時簡精銳擣其空虛則目  
前之計也是爲飭武備疏入上嘉之九月命主事筦  
太倉銀庫者註選三年太監膝祥靡費上供少傳兼  
太子太傅工部尚書雷禮與相左疏退許之吏科都  
給事中鄭大經言祖宗朝大臣有故去則始之慇留  
繼以優禮勸忠也雷禮之去陛下恩禮疎闊臣甚惑  
焉抑左右大臣先帝遺以事陛下而紛然求退便身  
忘國亦望天語宣示以作有位之忠上曰優禮在朕

諸臣宜殫忠脩職無求退成風有乖致身之義增武舉額令買貓睛寶石頃之罷十月遼王憲燭有罪削爵降庶人禁高牆除其國十一月復故兵部尚書金獻民大理卿湯沐光祿寺少卿余茂才爲民右副都御史陳講杖死吏科都給事中王俊民原職獻民講沐予贈官祭葬有差閒住太監李芳數直諫命錦衣杖送刑部獄待秋決尚書毛愷言芳坐罪未明臣等莫知置詰上曰芳不禮朕冬至祀圜丘還朝行慶成禮十二月議久任諭戶部買諸色寶石珍珠睛碌鑽期三日尚書馬森奏言陛下有詔罷採辦遠方奇貨

不至京師二年矣三日期雖猗頓輸金計然持筭亦知其不具也上趣之戶科給事中魏時亮言九月中皇上諭買貓睛寶石未幾賜罷中外傳播儉德流聞臣聞太祖高皇帝曰孔子之言如節用愛人真治國良規又曰珠玉非寶節儉是寶是以却文石御銅器教太子諸王曰前代奢儉不同治亂懸判當存儆戒常記丘言臣近讀皇上詔旨曰朕正供外母分毫妄費購買旨嚴分毫多矣舜造漆器諫者七人焚珠玉許爾輒有言且不治御史詹仰庇言臣聞珍珠寶石於殿前唐玄宗猶能之臣敢以堯舜望皇上上曰少

多藏中貴家陛下索之愈急彼價愈昂今南北多事  
兩廣缺餉疏請再三當事者存根本之慮不敢多與  
一欲珠石遂無惜萬金之費臣恐賤土地人民而貴  
珠玉也上曰有旨是歲蠲免天下存畱田糧三百三  
十四萬九千三百有奇

三年正月乙巳朔上拜天宮中謁奉先殿世宗皇帝  
几筵弘孝神霄二殿朝大同總兵趙岢敗虜弘賜堡  
予賞廩福建官軍出海逆擊海寇曾一本於柘林鹽  
埕及馬耳灣等處大破之報至兵部請先賞後勘破  
格以勸邊臣從之以底繼光爲總兵官鎮守薊州永

平山海等處盜劫榮昌捷爲設長寧永寧二縣上選皇后于別宮且一年疾甚困舉朝以爲憂涉宮禁莫敢明言巡視皇城試御史詹仰庇上疏請復之上殊怒衆謂仰庇禱不測已下旨曰后侍疾久歲無子又多病移別宮或暢意樂心可疾退爾不曉禁中事妄言姑不問上向不手旨至是親之中外翕然稱聖度二月復命太監李佑織被服諸服色花樣千八百六十疋以進工部言往者李佑之遣非登極初詔臣方望計日竣事乃今命繼進江南自島夷之亂十室九空料額不充勢且加派加派不已弱且死逋強且死

盜矣科道官亦言不允三月更名程番府爲貴陽設  
定南縣恤錄故兵部尚書丁汝夔右副都御史呂經  
史科都給事中董進第等官海賊曾一本勾僉犯廣  
東破碣石甲子官軍禦之無功總督兩廣張翰遣勦  
種賊覃公養等有斬獲四月復故戶部尚書李士翱  
南京刑部尚書顧璘兵部左侍郎劉源清刑部右侍  
郎王啓巡撫河南右副都御史雒昂巡撫延綏右副  
都御史張問行給事中錢薇沈漢安磐王科陸粲御  
史潘壯謝瑜原職賜祭葬贈官有差命取太倉銀三  
十萬兩進內戶部尚書劉體乾言銀庫見存三百七

十萬九邊年例當二百七十萬有奇在京軍糧商價  
不下百萬有奇蘓州大同諸鎮例外奏討卽盡發銀  
庫猶不足應望乞停罷不許體乾復言國計之乏有  
位共知若一人異同臣甘伏欺罔抑存庫之數乃近  
遣御史搜括所入萬一倉卒徵調何以支持如國事  
何科道官皆言大學士李春芳等上疏曰祖宗朝國  
用邊餉皆有定額庫藏尚贏世宗中年虜犯京師邊  
費日倍加以連年水旱災傷至今搜括已盡臣等方  
與所部日夜憂惶計無所出伏望念國儲懷永圖若  
上供必不可已請如祖宗故事取用內庫至外庫專

備軍國勿行輕取上曰取十萬套虜綽力免小黃台  
等欲抄掠寧夏總兵雷龍等襲破之陞賞總督侍郎  
王崇古以下有差封敬鎔爲秦王載堯爲襄王朗鑄  
爲韓王永定民王潔胥璣胥鬻產賑饑賜坊表五月  
上曰京城民爲報商苦累朕甚憫之戶兵二部亟議  
聞于是言官各上狀請清冒濫依時估發預支時給  
領均肥瘠禁橫索南贛巡撫張翀總兵郭成等擒斬  
會一本賊於大埔等處凡千三百七十餘人上命先  
賞參將蔡汝蘭等而後下兵部議功太和山歲收香  
錢約四千餘提督太監柳朝乞留脩官從之戶部尚

書劉體乾請比泰山事例令撫按官選委府佐一員  
專收正費脩宮之外盡以解部供邊內臣母涉上曰  
體乾屢違旨其回話體乾自訟乃罰俸半歲內官監  
所掌錢穀有庫廠房屋園地租稅歲入萬金漫無考  
核巡視御史詹仰庇令大使可華察其數內官監悉  
隱之支吾對云歲供內府傳造緊急精巧御覽器物  
及四時買辦進供花草果木蔬品之類或供造圓釐  
山脩理宮苑別殿亭榭軒閣花藥欄干慈寧宮花園  
乾清宮諸南花松竹樹株及龍鳳船輶轡戲寶彫渾  
貼金雲龍陛櫃箱臺香几白玉盆刻絲諸玩物工作

茲不外傳無預戶工二部仰庇因疏言御用供應工  
部具有歲例匠作悉給官錢內監貢綠侵漁爲民苗  
動委供進歸過朝廷如果賴此租稅以補內府不足  
之用則公費也何必隱焉乞勅戶工二部會同司禮  
監巡視科道查勘貨審宜留者留宜革者革應存多  
寡盡解內庫公需應弛予民者悉出還之臣又觀該  
監所稱無經甚矣費無經則小人覬利用無一二侵  
盜且十七八皇上誠身親節儉近侍之臣或以織造  
採辦爲玩好逢迎者盡屏斥之則欺冒不生何事取  
盈邊餉令司計者謀及於賣官鬻爵伏望念餉輓之

不支嚴羣小之靡濫服器惟儉浮冗悉除疏入上怒  
曰廝仰庇悖妄屢矣錦衣衛痛杖之午門百發爲民  
革去監局巡視科道官大使毋用大學士李春芳等  
言皇上天性寬仁卽位以來敬體大羣矜全頑薄如  
吏科都給事中胡應嘉以建言爲民隨改降調今仰  
庇稍有指適獨蒙重譴似非平日優容之度乞如處  
應嘉故事是日九卿楊博等各疏抹上皆報聞科道  
官鄭大經等言近戶部尚書劉體乾嚴被責罰與仰  
庇暴見摧廢恐天下不曉聖意妄疑爲中貴洩忿已  
南京科道亦以爲言上曰有旨矣何不遵且不治礪

賊突入婺源縣焚官庫官舍祭方澤六月贈故南太常少卿夏良勝爲太常卿工部郎中岳綸爲太常少卿漳州府推官黃直光祿少卿閏六月雲南武定叛囚鳳曆伏誅陝西盜何勉等殺百戶魯卿巡簡王鸞四川妖賊蔡一貫等焚劫銅梁大足諸縣七月詔取進光祿寺銀二十萬兩寺臣言不足上命減半禮部言供膳羞奉祭祀充宴饗則於光祿取財焉先帝之所稽皇上之所節也是以有贏今先後凡五十萬矣內府不足取之光祿光祿不足必行別派伏願罷宣索以舒征求科道官亦言上曰有旨命工部造明歲

朝殿燈及鰲山工部執奏言一燈之費至三萬餘金  
陛下柰何以詘乏之餘營不經之務且明年歲正日  
月交食而遊宴觀燈實累聖政上罷鰲山焉丙戌月  
食不見河決沛自考城虞城曹單豐沛抵徐州漂沒  
田廬不可勝數漕舟二千餘皆阻於邳上命戶部發  
太倉銀二萬擇司官一員往賑他被灾地方撫按官  
一體賑恤視分數蠲免何勉賊平八月壬寅祭夜明  
戊申祭太廟太社太稷以中外灾免行刑束鹿縣大  
水壞溺甚衆廣西總兵都督同知俞大猷福建總兵  
都督僉事李錫協勦海寇曾一本于柘林澚三戰皆

捷俘斬甚衆復與廣東總兵都督僉事郭成參將王  
詒追敗之乘蕪焚其舟生擒一本斬首五百餘級  
把總胡世趙紀哨總王宗瀛等死之論叙有差命總  
理河道都御史及諸巡撫分祭河濟江淮東北二岳  
及東鎮之神以弭水患設戰車營于廣寧工科都給  
事中嚴用和言東南灾傷重大請罷南京蘇杭織造  
召太監佑等還京南京給事中駱問禮亦言供應機  
房工費甚鉅尚書林雲同計無所出至稱病乞休宜  
遂停止工部尚書朱衡覆奏如其言且言節慎庫所  
貯常額多逋歲出入不相當匱乏之憂有甚于南上

曰織造有屢旨朱衡沽名賣直責對狀乃宥之遼東  
薊鎮招降夷人及虜中自歸者千九十八人賞巡撫  
都御史魏學曾等有差陞總兵官王治道子官一級  
凡月刑部尚書毛愷言刑獄六濫曰濫■曰濫詞曰  
濫拘曰濫刑曰濫擬曰濫罰上命行內外諸司痛治  
之虜大入大同右衛鎮川堡東西分掠山陰應州懷  
仁渾源諸處時河水漲溢自清河縣至通濟閘及淮  
安府城西淤者三十餘里決方信二壩出海平地水  
深丈餘寶應湖堤往往崩壞又山東莒沂郯城等處  
水溢從沂河直河出邳人民溺死無算河道都御史

翁大立以聞因繪圖十二爲濱河民頌困曰水次兌  
軍曰漕河築堤曰黃河驟漲曰昏夜守堤曰糧船過  
洪曰黃河埽捲曰茶城撩淺曰汎水衝城曰風雨異  
常曰海潮嘯溢曰灾民避水曰糧船漂沒復言時事  
可深慮者五曰東南賦藪也而江海泛溢粒米不登  
鞭撻雖加徒隕民命此京儲可慮一邊鎮關隘洪水  
衝溢墩堡傾頽無恃以守此虜患可慮二直隸山東  
河南皆股肱郡城郭不完積貯空虛賑貸乏策此內  
地可慮三海徼之間颶風鼓浪兵船戰士悉被漂沈  
此海防可慮四淮浙鹽場鹹泥盡衝團灶俱廢此國

課可慮五願陛下與公卿輔弼計求消灾弭異之方  
下所司副總兵田世威參將劉寶故坐石州陷論死  
繫獄輔臣言上得釋使立功兵科都給事中張鹵等  
言皇上嗣位以來視先帝時兵車不加多儲蓄不加  
富一時諸將傾心三軍生色者以去歲申維岳畢高  
之數足震懼邊臣而作其氣耳今虜報稍急卽出世  
威實立功夫良將非乏也虜未甚急而張皇如是令  
如曩時直薄都城何以應之且一事而生死異獄一  
律而先後殊致曷以服死者之心正國家之法也皇  
上果熟知威實之爲人乎果召問本兵失律之故召

問法司可矜之縣用何臣之薦因何言之入明示中  
朝斷而釋之誰敢不服而中旨特釋何以堅明主法  
克暢羣疑臣恐人臣假此干威福之權邊將因此巧  
窺伺之計上曰恩威自上鹵等瀆擾奪其俸辛卯上  
大閱將士都人快覩焉駕還樂奏玄武之曲總督戎  
政等官鎮遠侯寰協理侍郎王之誥等率將佐上表  
謝恩羣臣稱賀閱及格者皆賞遂勅寰之誥等曰書  
不云乎有備無患故治兵講武帝王重之我國家立  
京營養戰士講軍實於平時壯國威於警日越我皇  
考專命文武大臣總督協理戎政更新厥制大備通

年士馬消耗器甲彫弊將多怯敵兵無選鋒朕甚慮  
焉朕茲親閱將領薄示勸懲爾爲國爪牙尚體朕心  
毋玩愒毋營私毋苛擾庶幾部伍充實士馬精強稱  
朕張皇至意十月彗星見上問戶部天下戶丁糧草  
鹽引稅課銀通計三年支用見存幾何九邊年例軍  
餉太倉歲發及各省解納幾何具以數奏尚書劉體  
乾具上上曰歲計甚多臣下全不爲國體恤姑不問  
十一月甲戌冬至祀圜丘以歲灾豐免慶成宴是秋  
套虜吉能既西掠番夷其部落在套者東西分犯各  
邊不得利乃移營白城子伺我掣兵則乘虛入寇總

督王崇古謀得之先檄諭諸鎮引兵從花馬池長城  
關出邊抵白城子與虜戰虜因風縱火風反自焚遂  
北事聞賞崇古及寧夏總兵雷龍巡撫沈應時延綏  
巡撫李尚智陝西巡撫張師載等銀幣有差南京刑  
科給事中駱問禮條陳十事坐狂妄降邊方三級言  
官論株不許京師地震有聲詔百官脩省三日十二  
月上曰近來災異頻仍多因部院政事不調聽信刀  
風濫受詞訟誣害平人所致廠衛其密訪以聞刑部  
尚書毛愷等具疏引咎刑科給事中舒化御史劉賢  
等言我祖宗廠衛之設用以捕盜防奸非察臣下也

若使暗訪百官繇此開羅織之門神陷冤之術網害忠良貽殃善類非盛世宜有下所司潮州賊郭明胡一化陳一義等依山爲巢屠戮刦虜者二十年總兵官郭成分部勦之論功賞有差戶部尚書劉體乾言國家經費歲入不足供所出而陳乞支給每出額外民窮財盡職此之繇臣等請以今歲出入多寡之數與夫昔省而今費者條呈御覽仍以內外一切經費應存應革者竝用籍記刊示中外許之少保兼太子太傅吏部尚書楊博致仕起少傅兼太子太傅吏部尚書武英殿大學士高拱以原官不妨閣務兼掌吏

部事尚寶司司丞鄭履淳上疏曰伏唯時方多故萬  
姓爰咨頃年以來議論鴛煩上澤終不及民窮愁跼  
蹐民心殊不樂生燕雲遼代中原之脊也鼙鼓一聞  
三軍震動徐梁齊衛天下之腹也洪波蕩析四顧無  
烟荆襄秦洛形勝之區也疆狼馮依嘯聚相扇浙直  
閩廣財貨之藪也師勞費劇姦宄未殲搜斂日新耗  
蠹日甚請急增於接尅帑庾罄於那移宗藩之坐窘  
無籌中澤之哀鳴尤慘舟車盡敝飛輓多難杼軸旣  
空枷鎖猶逼民窮而事益不可息弊極而法竟不可  
行饑莘原荒朱殷邊圉蕭條閭里烽火關河武衛凌

夷卒伍驕怨內憂外棘百孔千瘡物怪人妖天鳴地  
震華星兩見於尾女日月繼食於元春鬼神吉凶苗  
害涼至緩急無備根本潛搖宜及今定周家桑土之  
謀切虞廷困窮之懼者也陛下諒陰恭默已三期矣  
憂虞閟必固不容靜逸之時濟濟多士或可慰承式  
之望寧曾召問一大臣面質一講官賞納一諫士竊  
慮高亢睽孤乾坤否隔欲見君子阻於車轔呈約巷  
牖寂無取舍忠言重折檻之罰儒臣虛納誨之功姬  
姜違脫珥之規周召拂同舟之義日觀絕疇咨之益  
便殿遞晉接之期回詰旣懲趙普奚從而補牘內批

徑出蘇轍何自以封還紀綱因循賢愚玩愒功罪之  
欺蒙罔核浮繁之文案徒盈善類既失於振揚厲階  
陰啓乎奄寺言涉宮府輒肆沮撓梗在私門堅不可  
破始也童牛羸豕之圖不豫它日城狐社鼠之計莫  
施逮其風行勢協釁積權移會使台輔具員六卿拱  
手元良愠悔於孤立威福倒驅於冠裳茲霜雖未水  
月已幾望而處堂燕雀蔽日雲霾牽制優游朔風孔  
後寧顧倚之繇頤裕蠹遂可濟蹇亨屯臣願皇上奮  
英斷以決計弘濬哲以任賢思上天培覆之命爲難  
謹念下民向背之情爲可畏移美色奇珍之玩而保

瘡痍弛昭陽細務之勤以和庶政關門勁敵誓于蠻夷黎庶脂膏儉于錢穀拔用陸樹聲石星之流以建法家拂士省納殷士儕翁大立等疏以求輶議許謀經史講筵臣民章奏必與所司面相可否絲綸親授都俞文微察變謹微回天開泰疏入上曰履淳假借

陳言妄議朝政廷杖百繫刑部獄

四年正月己巳朔日有食之庚午上始朝避殿減膳脩省三日上曰畿輔近邊武備久廢言者皆詳內略外貢萬全耶兵部其悉心議奏內承運庫以空頭劄子傳諭戶部進銀十萬兩部臣劉體乾執奏陛下出

片紙臣不知真僞不敢奉詔上命如數上癸未上元  
節以天變未省免百官假禁民間張燈作樂月食二  
月命太子太保禮部尚書兼文淵閣大學士趙貞吉  
兼掌都察院事趙貞吉請分京軍爲五營稍如國初  
五府之舊下兵部會議尚書霍冀等議上三大營如  
故推智勇將官三員充總兵官以文職大臣一員總  
理之上如議因命總督京營戎政恭順侯吳繼爵中  
軍都督府僉事署都督僉書袁正五軍營副將署都  
督僉事焦澤充三大營總兵繼爵五軍營正神樞營  
澤神機營陞南京右都御史曹邦輔爲左都御史閱

視之戎縣都蠻河阿大等寇掠高筠等縣湖廣金崗  
安撫司土舍覃壁作亂建英明閣于禁中荆王翊鉅  
薨冊封魏氏爲英妃秦氏爲淑妃李氏爲德妃劉氏  
爲莊妃董氏爲端妃馬氏爲惠妃三月改三營總兵  
官爲總督皆以勛臣領之於是以定西侯蔣佑領神  
樞營平江伯陳王謨領神機營命曹邦輔專督五軍  
營而以前總督兩廣左都御史兼兵部左侍郎劉燾  
以舊官總督神樞營前總督宣大山西右都御史兼  
兵部右侍郎陳其學以舊官總督神機營鑄隆慶通  
寶制錢甲申尚衣監太監敏傳旨命南京加造殷疋

十餘萬工科都給事中龍光執奏工部覆言加徵不如趣正供新派不如責舊逋上頗然之諂供御者別造三之一他悉以准逋額命戶部買白綿二萬五千斤尚書劉體乾奏湖州額綿旦夕解至上趣辦戶科都給事中李已諫曰臣聞物聚於地產赴于時京師則非其產三月則非其用求者苦難鬻者持價日墜商人于市難卒具也都民困於編商十室九空固宜加恤體乾復言商賈聞命率匿身閉市京師根本地衆口嗷嗷非平世所宜有也上悟令半買四月出尚寶司司丞鄭履淳及內官李芳淳削籍爲民芳充南

京衛軍虜俺答縣平虜邊口入犯老營南趣朔應山懷諸路轉攻平虜城犯威遠宣大總督陳其學率總兵胡鎮等東趣左衛掠之抗拒十餘日遯去論功有差吏部舉雜職官當遷者前給事中駱問禮楊松與上曰何遽俟三年貴州宣撫司土舍安國亨爲其兄智告反巡撫都御史王諍發兵誅之無功內承運庫太監崔敏等請買年例金寶石上下戶部趣辦都給事中李已言庫藏方空邊餉最急請停罷上曰如故事尚書劉體乾言年例金趣解且至若貓睛祖母綠諸珍寶非民間所有責令召買必追呼騷動民鑿筆

楚感傷和氣請如臣已言罷之不許五月戶科都給事中李已給事中陳吾德言伏覩陛下登極詔書停止採買蠲除加派其時海內歡若更生何比年以來近習干請奸巧紛紜買玉買珠傳帖屢下旨出而輒更命成而忽易太監敏等復行故智雖臣等懇請戶部執奏終未允允其何以示大信於天下乎夫抵璧投珠先王懿矩毀牀碎漏聖祖芳規縱國家十分充實陛下猶當慎乃儉德矧今府庫空虛小民困竭邊方之發餉無時畿省之賑荒不已計臣日夜懷憂陛下奈何以一玩好之微費數十萬使其不經於今日

無計於後來敏等獻詔蓄欺唯欲假供用以充已橐  
陛下惑於奸計竊恐將來無已伏望俯從部議亟斥  
敏等以昭儉全信上怒已沾名犯上廷杖百送刑部  
獄吾德黜爲民外補科道官裁革廣東巡撫官改兩  
廣總督李遷爲提督兼總之南韶積寇黃朝祖殺掠  
興仁縣尋據桂陽之羅木山巡撫南贛汀漳等處都  
御史張翀勦平之夏季京庫銀額故二十五萬戶部  
尚書劉體乾先奏進十七萬其餘請行府州縣督徵  
有旨切責體乾過期支吾令亟以太倉銀補進六月  
丁酉朔上諭禮部天旱苗槁其傳示順天府官精憲

十日毋忌是夜雨明日又雨又明日大雨上悅加瀆  
州知府侯必登從三品服俸有直宿較尉負一冕棄  
北安門外北城兵馬指揮孫承芳疑有奸使汎鞫辭  
連內臣陽春陽春奏言不知何男子入內偃臥臣遣  
較負之出乃死承芳主事擅刑禁軍當治上命杖承  
芳六十黜爲民釋較尉戶科右給事中查鐸刑科都  
給事中舒化等請下陽春法司驗問不聽建光泰殿  
瑞祥閣於長信門南工科都給事中龍光諫不聽工  
部尚書朱衡等言隆道英明等閣方竣再興大役不  
唯財力有限地道宜靜亦恐禁地不安上罷以京師

久雨壞民廬舍免房號錢三月七月禁章奏繁詞令  
撫按嚴治酷吏命王官陞補皆六年考察如京官例  
令撫按官嚴覈司府以下有入已贓者追出濟邊受  
賄枉法者如律問遣先是以内供不足下戶部取太  
倉銀又令買金雲南尚書劉體乾多執奏至是雲南  
年例金過期不至中旨詰責之體乾具疏引罪上責  
體乾抗旨手詔勒閒住科道官連章交畱不聽庚辰  
月食令監司州縣長吏毋偏重進士築海鹽塘成八  
月虜犯錦州總兵王治道引兵出塞逐之有斬獲論  
賞有差祠河神于夏鎮梁山皆賜名曰洪濟昭靈諺

虜且大舉入寇勅譚綸督鎮巡謹禦之及宣大總督  
王崇古整兵待援竝許用軍法京師戒嚴起前左都  
御史劉熹駐守通州南京兵科給事中李崧言南京  
織染局續添機張增募匠役詔書先革太監劉安等  
輒奏請復之祖宗舊額設機三百張軍民匠三千名  
今不論司局之非人而妄謂機匠之不足請工竣之  
日悉行停止上以崧瀆擾詰責之釋李已黜爲民九  
月復浙江爲事官劉顯署都督僉事總兵如故罰其  
俸三月罷恤錄嘉靖中得罪諸臣追削故掌錦衣衛  
事陸炳奪其誥命子姪官者俱革職爲民家人杖遣

之籍其家以久任賢能加橫州知州鄭國臣脩仁知縣唐執中服俸河決邳州自睢寧至宿遷淤一百八十里虜覘我有備引去京師解嚴虜入大同鎮之嵩溝老營副總兵錢棟坐營指揮張汝紹把總喬文奎死之以宣大等鎮官兵赴援勞苦詔兵部犒以萬金祀故太子少保禮部尚書兼翰林院學士歐陽德於鄉虜犯遼東錦州大勝堡總兵官署都督同知王治道及參將歐陽功死之予治道贈謚祭葬廕子三級予功贈廕子二級皆賜祠編置方士王金陶倣劉文彬等於口外復京營制如舊十月虜酋俺答孫把漢

那吉率其屬阿力哥等十人來降以把漢那吉爲指揮阿力哥爲正千戶山西道御史葉夢熊言把漢那吉之降遽授官爵恐結仇激禍如宋郭藥師張谷事上責其妄言降二級外調之諭掌吏部事大學士高拱等曰朕卽位以來科道官欺亂朝綱有日矣卿嚴察其奸邪不職者以聞掌都察院事大學士趙貞吉請毋考察以養護國家之元氣愛惜宇內之人才上報有諭旣考多拱所嫉惡者上降斥如所請因下諭科道官自今毋得搖亂國是倚報恩仇仍前者治無赦吉王翊鎮薨十一月冬至上祀圜丘還朝行慶成

禮受賀賜宴予趙貞吉致仕以考察與拱異同也

二月虜執我叛人趙全等以獻告郊廟獻俘受賀遂

磔全等于市傳首九邊加王崇古太子少保兵部尚

書兼都察院右副都御史廩一子錦衣正千戶世襲

賞銀五十兩大綺紅蟒衣一襲總督如故內閣輔臣

李春芳等兵部尚書郭乾等皆有叙資處州礦盜作

亂從昌化突入寧國池州沿江剽掠

五年正月甲子朔上拜天于宮中謁奉先弘孝神霄

三殿御朝受賀吏部會都察院考察方面有司按察

使楊綵副使江一麟僉事蕭大亨知府丁應璧徐學

古侯必登李渭高文薦同知章時鸞知州許希孟知  
縣林會春徐成位曹大埜劉不息等十五人以卓異  
旌賜衣一襲鈔百錠以朝覲至者宴禮部詔取太倉  
銀十萬于內府戶部以軍國不給請以抵春季年例  
數不許取光祿寺銀二十萬寺臣及巡視科臣各疏  
爭諂半減二月文武羣臣及天下朝覲官謁見皇太  
子于文華殿左門以政績卓異調陝西按察副使徐  
學古于山西加從三品服俸僕寇突入澄邁縣襲陷  
海南衛所遣內臣督造羊城於陝西工部尚書朱衡  
及科道官上疏請止上曰有成命起致仕少傅兼太

子太傅吏部尚書楊博爲兵部尚書封皇子翊鏐爲潞王三月封虜酋俺答爲順義王賞大紅五絲蟒衣一襲綵段八表裏賜之勅曰朕唯天地好生自古聖帝明王體天徧覆華夷一家欲茲生也頃者爾孫來歸朕命邊臣護視給其服食厚拊遣之爾感朕恩願稱臣內屬歲歲入貢永爲荒服俾獻叛賊以表懇誠朕甚嘉悅茲封爾爲順義王爾弟爾子及諸部落頭目益授都督等官俾爾世居本土各安生業同樂太平爾尚約束爾衆永篤恭順若自乖大義輕棄盟言天地鬼神實不福爾尚欽承之陝西紫陽賊羅朝用

等平緝治四方游民潛居京師者四月燒造瓷器於江西詔十餘萬以鮮明細薄者進河決邳州自典頭集至王家口新堤多壞府江猶僅刦虜官軍閘封碩熿爲唐王縉熿爲肅王五月古田種賊韋銀豹等平總督兩廣侍郎李遷巡撫廣西右僉都御史殷正茂總兵官俞大猷等論叙有差以卓異加陝西僉事叢大亨從四品服俸南昌知府丁應璧三品服俸七月復故戶科給事中張齊官黜致仕左都御史王廷爲民奪致仕刑部尚書毛愷官織造羊城於陝西凡三萬二千餘匹詔學倉驛遞官得選本省乙亥月食八

月楚王英燦薨勅脩舉邊政九月從祀禮部左侍郎薛瑄於孔子廟廷先是令四夷貢使不得引見御前禮科都給事中張國彥言朝鮮冠帶禮義之國請班如故乃許班種賊韋銀豹佯京師磔于市十月造鰲山燈工部尚書朱衡工科都給事中陳行健等疏罷報聞命盜決故決徐邳上下河防者如决河南山東河之罪貴州土舍安國亨來降十二月禮科給事中蔡賢言皇上一身宗社生靈之所托重不可不謹也臣因長至尊駕竊窺聖容微減今微陽初生正安靜之時願省覽典謨訓誥以陶養此心親近師傅公卿

以維持此心齋居澄慮進御有常毋令溺志遊觀有  
度毋令移情則欲寡氣清神凝體因朝宇可以常御  
經筵可以不輟郊祀可以無攝宗社生靈幸甚報聞  
戶部進續買珠寶共用銀二萬二千四百兩有奇上  
怒不中責該司對狀尚書張守直引罪請再行収買  
上奪司官俸半歲詔進太倉銀馬價銀各十萬於內  
庫太僕寺卿曾省吾科道官章甫端等言今民窮財  
訕水旱淳臻宜廣積貯以備緩急上曰有旨令雲南  
等處採辦珠石以進虜寇遼東總兵官李成梁等大  
破之陞總督劉應節等俸一級成梁署都督同知廈

一子正千戶世襲上御門宣捷受賀

六年正月戊午朔上朝受賀詔雲南廣東採辦珠寶歲進青紅黃寶石二萬塊大珍珠八千兩三年而止科道官奏乞崇儉蘇困報聞春享遣代試御史田子堅諫上曰廝堅狂妄且不治命工部尚書朱衡兼左副都御史經理河工命顏氏裔孫嗣慎襲翰林院五經博士御史張克宗等請考世子齒讓之制倣宋儒坐講禮以爲東宮講讀助上曰祖宗有成禮克宗敢妄議變更降二級外調之餘皆奪俸二年二月置新寧州甲午冠皇太子倭分犯廣東化州石城縣攻破

錦囊所殺一千戶攻陷神電衛城一時吳川陽江高  
州海豐等縣竝遭焚劫而山寇黃朝太復起甚猖獗  
取進太倉庫銀十萬戶部言祖宗內庫之藏百萬而  
已比歲詔徵多取一百一十萬矣茲復取十萬非制  
也且今視祖宗時何如哉先臣丘濬所計已十倍往  
昔嘉靖十八九年以後復被當事奸貪之臣開邊方  
冒濫之請財竭民窮誅求無策今又迫而取之或以  
啓弄潢脫巾之變願皇上詢往事収成命上曰卿言  
是且知旨科道官皆疏諫上曰有旨上降龍袍樣每  
色十疋褶服袍襖每色百套絨錦織金閃色暗花素

每樣百疋上用鸞帶每十條賞用每二百條遣內臣  
往蘇杭織造剪絨納織各色紵絲樣二十四張每樣  
每色織三十疋柘黃大紅桃紅鸚哥綠翠藍青玄色  
白紫玉色鷺黃共十疋錦織每十疋鞶衣紵絲紗羅  
每五十套裙襖每一百五十套下南京供應機房織  
造科道官疏請停止不允工部言蘇杭自倭患之後  
瘡痍未起加以水旱流移府庫虛竭而織造之費甚  
鉅勢必加派民困難支請大加減免或去其半所遣  
之人尤宜慎重上曰卿可擇其要者先織上所遣官  
令安靜行事毋得擾民閏二月上御皇極門疾遣禱

告郊廟社稷還宮江西巡撫都御史徐栻言上降光  
器樣燒造難就上曰龍缸改中樣方大匣改小樣先  
後進冊封莊氏爲敬妃李氏爲恭妃于氏爲懿妃葉  
氏爲奇妃御史蕭履上言冊典屢行宮掖太盛神氣  
大勞以致聖躬不安乞節欲延壽不報倭犯浙寧高  
雷等處官兵與戰于外村島嶼以捷聞三月皇太子  
出閣講書定捕盜條格州縣掌印巡捕官有盜至十  
人者降一級二十人者降二級三十人者罷官兵備  
及該道官所屬盜起至五十人降一級七十人者降  
二級百人以上者罷官東虜速把孩瓦青等犯長勝

堡守備指揮范芝等戰却之尋犯清河堡守備曹璽等又大敗之陞賞有差復海運尚寶司卿劉奮庸疏言皇上卽位六載海內非不乂安而灾沴未消外夷非不威順而伏機可慮朝綱若飭矣而大柄漸移仕路若清矣而積習仍舊百司方引領勵精之治而皇上精神志意漸不逮初臣雖微賤念潛邸舊恩不忍默默謹條上五事一曰保聖躬人君一身天地人神之主也清明在躬而後可以當萬務皇上宜深思宗社付託之重念此心保守之難定志凝神抑情忍性母輕萬年之慮逞旦夕之娛母以有限之精神殉無

涯之嗜慾二曰總大權人主必操攬大權而後臣下  
莫敢行其私在昔先帝英明果斷恩威莫測一時在  
位仰承恩澤後今政府之所議百司之所布非不奉有  
明旨施行也顧皇上曾否斟酌從違其問乎人才用  
舍果盡協公論無敢私快恩讐者歟卽如輔導東宮  
本閣臣之責輒敢爲身圖之便朝廷名器本屬世之  
具今乃爲市恩之物先帝時誰敢如此伏願庶府建  
白閣臣票擬特留清覽時出獨斷以觀萬化之原三  
曰慎儉德財耗則民窮民窮則國家元氣隨之盡是  
以古帝王兢兢奢欲爲戒也今國用邊儲年例必不

可減歲入歲出曾不相當而皇上卽位以來內府取銀不下數十萬求珍寶作鰲山服御器用鏤金雕玉其於身心政事果何所裨生財甚難靡敝無紀良可惜也四曰省章奏人臣進言未必一一中節心固忠國家耳今一切置不覽非惟沮樂告之益倡游言之端抑恐憮邪權勢之黨轉生猜忌御下蔽上成其奸也五曰用忠直忠直國之幹也與承望風旨泄它人之憤迎合權要樹淫黨之朋者固自不同比歲臺諫之臣間有斥棄願恕其狂直嘉其誠款予之召還庶幾廣仁宥於既往作直氣於方來下所司安慶軍亂

械繫指揮張志學知府查志隆於京師戶科給事中  
曹大埜論劾大學士高拱調外任拱辭位上褒留焉  
更以劉奮庸前疏有傾陷拱意降一級調外四月提  
督兩廣侍郎殷正茂言廣東山海之寇日益充斥民  
疲奔命死徙過半陛下歲令採珠八千兩三年乃已  
計所費至三十萬金今軍興一切不贍請稍殺之改  
千爲百寬三年爲十年戶部覆奏上從之復故總督  
浙江軍務太子太保兵部尚書胡宗憲職賜祭取太  
倉銀十萬兩備端節賞賚廣西府江右江諸猺獞復  
亂封翊鑾爲吉王五月廣東賊李茂破樂會縣

月食丙午上不豫增劇百官疏起居已酉大漸召高拱張居正高儀入受顧命上倚坐御榻上中宮及皇貴妃擁御榻邊東宮立榻右拱等前跪宣受顧命上口不能言熟視諸臣領東宮屬之勅皇太子曰朕不豫皇帝屬爾尚思保守帝業脩德進學任賢使能毋有怠荒先是正月下旬上有疾且有脫瘠在理越月稍平以閏二月初旬視朝既鳴鍾百官班閣臣高拱張居正自閣出北上過會極門望御路中乘輿在焉亟趨赴內使數輩馳宣閣下則上已下金臺有怒色立欲就輿諸內使環跪上見拱色稍平手執拱衽甚

固有欲語意拱奏曰陛下何爲發怒今將何往上曰吾不還宮矣拱曰陛下不還宮當何之望還宮上稍沉思曰爾送我拱曰臣送上釋拱袒執拱手露腕示瘡曰尚未落痂也因憤恨語曰祖宗二百年天下以至今日國有長君社稷之福奈東宮幼小連聲語一語一頓足握手拱曰陛下萬壽無疆何出此言上曰有人欺負我拱曰是何人有祖宗法在皇上病新愈發怒恐傷懷上良久歎語曰非內官輩先生安得知蓋宮中事也於是執拱手行入皇極門下丹墀上左手啜茶右執拱手如故顧拱曰我心稍定遂繇東

角門入至乾清宮門拱止上牽拱手曰送我隨至寢殿上升榻坐猶執拱手時張居正朱希忠皆榻前叩頭上見拱踴躇不安乃釋手拱下叩頭竝辭出宮門外須臾復召入立丹墀命再上遂上殿至榻前上從容曰朕一時恍惚又曰有後事卿等詳慮而行皆叩頭出須臾內侍傳旨高閣老守宮門毋去薄暮傳旨宿宮門拱附奏曰乾清宮大內也祖宗法度甚嚴臣等晝且不得入况夜宿不敢宿然不敢去當宿於西闕有名卽至有傳示卽上對許之明日亦如之旣傳聖體稍安拱上札子曰臣聞聖體稍安不勝慶幸今

府部大臣尚朝宿不散宜降旨令各回辦事以安人心臣等仍晝夜不敢去卽擬旨上請上卽降旨又四日上益平愈拱問安上遣內侍慰勞命還家至是復勅拱曰朕嗣統六年偶得此疾遽爾不起有負先皇付託東宮幼小朕今付卿等三臣卿等同司禮監協心輔佐功在社稷萬世不泯拱讀旣慟不能勝卽哭奏曰臣受厚恩誓死報上東宮雖幼有祖宗法度在臣竭忠輔佐有不得行臣不敢愛其死且奏且哭已大慟長號兩宮亦皆失聲哭遂出庚戌上崩壽三十六七月丙戌上尊謚曰契大隆道淵懿寬仁顯文光

武純德弘孝莊皇帝廟號穆宗九月葬昭陵

臣喬遠曰上端凝靜密不殺自威不察自智優崇輔弼假借臣僚用能守祖宗之法以致中國乂寧外夷向風之盛蓋清靜合軌漢帝寬仁比迹宋宗矣上在潛邸時食驥腸而甘及卽位間問左右左右請詔光祿上不忍曰若爾則光祿日宰一驥矣歲時遊娛行幸諸供膳光祿先期請上旨爲豐約上常裁取最約者焉